



中復堂全集 十六

和
854
16



康輜紀行卷之四

桐城姚瑩展和甫

初八日浴佛之辰裏塘諸寺集眾僧誦經蕃民男女皆禮佛一如內地惟寺僧自然酥油鑿燒旃檀香蕃人禮佛者不持杵手執牛角遙望見寺每行一步畫地膜拜遍繞其寺而後入門頂禮余自打箭爐至是所過刺麻寺多矣僧既穢濁其誦經喃喃皆在喉間併無音節亦無鐘磬惟鉦鼓喧振雜以鈴鈸而已聞巴塘與藏中有梵音略如內地得一絕云聞道西來尋梵唄喃喃不辨鼓還鉦經過三百八十寺何處一聞清磬聲

右蕃人禮佛

是日將晚烏雲甚濃陣雨斜飛忽東西青虹長互頃刻晴空霽色山光即景欣然成一絕云小樓終日對蠻山積雪

時消草尚斑嚮晚烏雲渾欲雨晴虹忽墜枕窗閒

與了成之別駕寓裏塘小刺麻寺樓上二十餘日督乍雅
那們汗西行室裁方丈一窗如窗兩人對榻坐臥戶外晨
夕炊烟作馬牛糞味散步無所兀兀自嘲口占示別駕調
之云丈室經旬似繫囚炊烟糞味幾時休無端卻憶文丞
相燕市三年一小樓又代答云生非博望使河源豈問祇
陀孤獨園丈室自開獅子座文殊摩詰兩無言

右刺麻寺

樓詩二條

佛經言律部沙門比丘服壞色衣及糞掃衣即今之緇衣
也升座乃衣僧伽梨即今之紅袈裟也余自打箭鑪以西
所見刺麻服色無不敗紅者黃教惟帽作黃色耳紅教刺
麻則帽色亦紅從未見有緇衣之刺麻何耶近日中國僧

衣常服亦分宗教律三種律門緇衣宗門淡黃色衣教門
椶色衣以此為別惟升座及禮佛則均紅袈裟猶古制歟

右蕃僧服敗紅衣

十二日土司餽牛肉一甌飲酒未半甌陶然竟睡夢得一
律云世事紛紛各有胎八遺物我不須猜縱成木養形先
稿慣作鷄栖心未灰泛海黑風時自警攫金白晝亦堪哀
青天亙古無中外倦馬臨歧首重迴

右夢詩

甚矣禍福之念中人深也西蕃崇信刺麻非以其教之善
謂其能禍福人耳乍雅呼圖克圖住裏塘數年蕃人見之
數十步外即五體投地匍匐蛇行而前儻呼圖克圖手摩
其頂則大喜以為佛降福也或病有憂者得之則以為消
災滅病矣或不驗亦惟自咎罪孽深重而已尤可憫者謂

呼圖克圖修行數世元陽不洩並其渺瀟亦寶重之日得
其一滴服之可以延年治病蕃僧皆樓居男婦有持器終
夜守其下以待者蕃僧亦自珍貴以瓶盛貯而蠟封其口
非虔誠備禮求之不輕予嗟乎吾人聞此未有不笑其愚
者豈知獻媚權門屈身昏夜得其咳唾以為珠玉者亦何
異於是哉

右蕃俗信呼圖克圖餘瀝

十四日陰晦霏霰竟日讀衛藏圖識漫題云細雪霏霏晚
未闌重裘四日覺深寒攜來圖識多驚異薄酒燈前擁被
看

右讀衛藏圖識詩

乾隆中西藏平定當時諸公紀事陳風之作甚眾豔傳者
如駐藏大臣和泰庵之西藏賦及顏懔甫尙書之衛藏詩
皆採入通志顏詩八十韻今摘其中三十二韻云直北瞻

丹界迤南陽布迎西洋爲後戶麗水卽前川中拓數圻地
三危別有天礪房徇月窟毳幕走雲駟酥酪手相接氍毹
夜自聯獬狝妖祀熾咒詛土風沿雪海無方漲冰天不肯
旋飛橋搖鐵索危波鍛皮船梯度阻蕃馬繩行拋竹篾層
層踰嶺坂藹藹見原田細碎成村落縱橫展陌阡麴苗秋
隱隱跋布水濺濺大小招相別黃紅教各詮渾無生死法
但有去來緣般若凌霄峻浮圖射日圓雷聲轟鼓鐵井宇
列街塵乞食沙瓶鉢搜山鹿野畋牛羊紛牧放茶茗細熬
煎蠻妓經營巧寶婆織絛便花裙甯窈窕赭面亦嫵媚不
信清笳隊都教彩線纏瓢笙蘆管樂烏鬼鴿王延辛布當
胸挂重環綴耳穿多情聚麀鹿奇葬付鷓鴣引袂雜男女
踏歌非醉顛有時槎碧鬪隨意揀紅棉犬或獬頭惡鷄胡

象鼻卷紙光裁貝葉香燼熟龍涎聞日飛堯典瞻星失斗

躡地原章步外人在閩風巔剝落唐碑臥婆娑古柳眠去

華真絕遠殊俗若為渝頗盡西藏風俗

右顏制軍西藏詩

通志載馬若虛西藏雜詩四首頗具風格今錄之於此余

本落拓子浪游川西東曾磨盾鼻書卅載三從戎飽飫五

侯鯖禿穎居囊中有時草飛布下馬筆如風邇來藏直駘

三語將毋同老成漸徂謝噩夢醒槐宮來此適羈鄉習靜

證六空回首望蜀道羌首如飄蓬一以人生日營營苦為利

名逐袴褶騎塞馬迢遞向荒服如何典春衣斗酒醉平陸

朝攜田閒侶暮向茅檐宿俯仰庭下松磔矻多節目長嘯

視浮雲無心手翻覆不求姓名傳亦免污青竹

其二暮春風

日住四山啼蜀魄憶我浣花溪柳棉已飛白時游丞相祠

手摹青銅柏于今落巒嶠誰與數晨夕渴羌難用武樽酒

比瓊液但聞風怒號勢欲捲磐石閉戶送青春孤負遠游

客其三靈芝不為瑞鵬鳥不為災鵬翼振九萬落鷄依蒿萊

窮達由天賦衛雀生與臺夢游華胥境爛醉康衢杯熙熙

樂無涯醜獨支其頤足跡如大章恨未窮九垓野馬不受

右馬若虛詩

羈天真返童孩無端作嚙語釋悶非程材

西地烏鴉大如肥鷺聲若鴉鷗不巢樹而棲人樓屋上甚

可憎為詩云跼步岑樓不出門密雲小霰易黃昏生憎密

外烏聲惡莫作長沙鵬鳥魂

十五日曉起陰寒屋上存霜如雪旋消去午後復小霰半

刻

舜嵐三苗于三危乾隆中始考定其地為康衛藏在蜀微

之西滇徼之南察木多及前後藏正其地也余按禹貢三危既宅正義引鄭氏注曰河圖及地記書云三危在鳥鼠之西南當岷山則在積石之西南今輿圖甘肅鞏昌之渭源縣北有鳥鼠山以爲渭水之源所出是也然余行履巴裏二塘以西及察木多一帶鳥鼠多同穴處不獨鞏昌則三危之爲衛藏似矣但數千里皆山不知何者爲三危耳又疑黔滇湖南皆古三苗地謂之三苗必有三種舊說以爲兄弟三人始鼠一處後不悛惡乃更分析爲三而處之則三危之爲一山與否未可定也後漢西羌傳云西羌之本出自三苗姜姓之別也其國近南岳及舜流四凶徙之三危河關之西南羌地是也章懷注三危山在今沙州燉煌縣東南山有三峯故曰三危也河關縣屬金城郡已上

並續漢書文據此是古說皆以三危在西而章懷所指在燉煌縣東南者更明傳此文下云濱於賜支至乎河首綿地千里賜支者禹貢所謂析支者也南接蜀漢徼外蠻夷此文尤明白則三危地在今四川西北甘肅徼外正西恭青海土爾扈特游牧之閒上距燉煌適在東南其西卽鄂敦他拉海所謂河源者也古說三危山當在此處諸書皆合今察木多札雅巴塘裏塘皆在燉煌之東南上距燉煌已二千餘里與後漢書濱于賜支至乎河首者顯異康衛之說果信乎余謂以諸書考三危不若以禹貢考三危也禹貢三危在黑水之西南導川文云導黑水至于三危入于南海今中國江淮河濟皆入東海其在占城交趾以南始爲南海中國所不見也黑水入之其不在中國可知既

云黑水西河惟雍州又云華陽黑水惟梁州二州皆以黑水爲界西河卽河之西也華陽卽華山之南也梁州北界旣止于華山其南界何止乎紀之以黑水則黑水爲梁州南界可知矣河水發源於中國之西故謂之西河雍州界起西河者雍州之東界也其西界何止乎紀之以黑水則黑水爲雍州西界可知矣今陝西甘肅乃禹貢雍州之域四川雲南乃禹貢梁州之域華山爲二州內界之分是黑水爲二州徼外之界又可知矣求黑水者不惟當於徼外且當於雍之極西梁之極南水色黑而入南海者求之乃確明張機黃貞元皆以滇徼外由緬甸入南海之大金沙江當禹貢黑水一統志以其水遠在西南荒徼外去雍梁二州之境甚遠非之而以潞江之上流喀喇烏蘇當禹貢

黑水是矣黑水旣定然後可得三危

右古三危

一統志云雅魯藏布江源出藏之西界卓書特部落西北三百四十餘里達本楚克喀爾公喀爾城東北喀爾招木倫江自北來會合而爲一復東南流一千二百餘里經衛之南界過羅喀布占國轉西南流入尼納特克國會諸水注於南海此水源流甚廣不入中國按唐書吐蕃贊普居跋布川或邏娑川地理志跋布川在邏娑川西南涉藏河乃至其地疑此卽跋布川也滇人謂之大金沙江張機黃貞元謂此真禹貢之黑水張機曰大金沙江發源崑崙山西北吐蕃地卽禹貢黑水也雖與雲南小金沙江及瀾滄潞江皆發源吐蕃然大金沙江之源較三江最荒遠且其源於三江源邈不相近其下流亦十倍小金沙江及瀾潞

康輅紀行 卷之四
三江之水禹貢華陽黑水惟梁州黑水西河惟雍州周文
安辨疑錄云甘州志甘州之西十里有黑水流入居延海
肅州之西北有黑水東流返遠莫窮所之是其源入雍州
之西流入梁州之西南也雲南志金沙江山西蕃流至緬
甸其廣五里徑趨南海得非黑水源出張掖流入南海者
乎黃貞元曰大金沙瀾潞三水雖皆入南海大小遠近迥
不同瀾僅潞四分之一大金沙十倍瀾潞瀾潞所出地名
鹿石山在雍望俱可窮源上源亦狹大金沙江上源相傳
近大宛國自里麻茶山至孟養極北不聞有所往號赤髮
野人境峭壁不可梯繩弱水不任舟筏土人惟遙見川外
隱隱有人馬形殆似西羌之域也今姑略其源惟自經流
支流入海可見者言之水流至孟養陸阻地有二大水自

西北來一名大居江或云大庫江一名檳榔江二水至此
合流又名大盈江今騰越人總甸內諸水亦曰大盈江殆
竊侈其名也江流至此夷人方名爲金沙江江中產綠玉
黃金鉤子金精石黑玉水晶閒出白玉濱江山下出琥珀
滇人相傳名大金沙江若以別麗水北勝武定馬湖之小
金沙江耳自此南流經官猛莫瞰莫卽至猛掌有一江自
西來入大金沙江又南下昔朴怕蚌猛莫外經蠻莫有
一江源自騰越大盈經鎮夷南甸千崖受展西茶山古湧
諸水伏流南牙山麓出經蠻莫入大金沙江江又經蠻法
勒孟拱遮鼈營屯大菖蒲山峽小菖蒲山峽課馬孟養怕
奔山峽戶董鬼哭山夏撒昔年緬人攻孟養以船運餉到
夏撒爲孟養所敗者此江也正統中蔣雄率兵追思機發

為緬人所壓殺於江中亦此江也大約江自蠻莫以上山
 聳水阻正統中郭登自章貢順流不十日至緬甸者亦此
 江也下流經溫板有一江源自騰越龍川江經界尾高黎
 共山隴川猛乃猛密所部莫勒江至太公城江頭城入於
 金沙江下流又經猛吉準古溫板又名溫板江又名流沙
 河皆金沙江也猛戛馬達刺至江頭江中有大山極秀聳
 山有大寺又有一江源自猛辨洗戛母南來入大金沙江
 又經止即龍大馬革底馬撒躋馬入南海其江自蠻莫以
 下地勢平行闊可十五餘里舊云五里者非也經南江益
 寬流益緩緬人善舟如涉平地至是江海之水潞為一色
 矣按以上張黃二說所指大金沙江其上流即今雅魯藏
 布江也此水雖大但遠在西南荒徼外去禹貢雍梁二州
 之境甚遠謂為黑水其說難信

一統志又云潞江在羅隆宗城東北六十里蒙古名喀喇

烏蘇蕃名鄂爾宜楚瑩按羅隆宗一作洛隆宗在巴塘西

西藏要道其源出衛之刺薩北二百八十里有澤布喀廣四

百五十餘里其水西北流百餘里入尼爾几根池池廣一

百三十餘里又東北流五十餘里入衣達池衣一池廣一

百餘里從此池轉東南流一百五十餘里入喀喇池池廣

一百二十餘里從南流出名喀喇烏蘇稍東北流四百五

十餘里至索克宗城南百餘里出衛境入喀木境名鄂爾

宜楚轉東南二百餘里又稍東過羅隆宗城北流三百餘

里折南流入百餘里經米喇隆池又二百餘里入怒夷界

名怒江自怒夷界南流三百餘里入雲南麗江府界名潞

江經野人界又南經永昌府及潞江安撫司境流至緬甸
 入南海按舊輿圖西蕃之四大流沙之南湧出一澤名嘉
 湖卽喀喇池也蒙古名黑爲喀喇水爲烏蘇明一統志潞
 江舊名怒江
 源出雍望蒙古封爲四瀆之一此水大於瀾滄葉榆而色深黑故名其上
 源出於衛地之布哈夫澤淵澄黝盟又多伏流以此爲禹
 貢之黑水則名稱猶舊較之指瀾滄葉榆爲黑水者猶爲
 略有依據也

瑩按潞江自源至流四千餘里水非小矣自衛之喇薩北
 行一千一百餘里其地接西甯甘肅外境卽禹貢雍州也
 自北南流復入衛境一千五百餘里入雲南經麗江永昌
 二府至緬甸入南海中經喀木雲南古之梁州也然則此
 水曲折經行於雍梁二州徼外來往三危而入南海脈絡
 分明與禹貢悉合且喇喀烏蘇之名正爲黑水不惟此水
 源流具備併可考見大禹時雍梁二州疆域之廣以經釋
 經是三危確在黑水之南黑水由此入南海非喀木與衛
 而何耶 右黑水三條

張氏以大金沙江爲黑水固與黃氏同誤而援辨疑錄以
 甘肅二州之黑水爲禹貢之黑水又牽合大金沙江而一
 之謂卽大金沙江之源尤誤按今一統輿圖甘州西有黑
 水河北流七十餘里入山丹河又北數里有沙河自西南
 之祁連山二百餘里來會北過高臺縣有擺通河來會北
 出長城六十餘里名額濟納河又北流七十餘里有滔賴
 河自肅州之南亦出祁連山北流四百餘里來會稍東北
 流四十餘里名坤都倫河又分爲二支河入居延海是此

河之榦流本山丹河也黑水乃一小支河長僅數十里耳
 卽山丹河自祁連山至居延海亦不過數百里何足當雍
 州分界之讖域乎况山丹河及黑水皆北流入居延海與
 禹貢至三危入南海之文顯異得非古今水道變遷之故
 乎瑩按公羊疏引鄭康成注禹貢華陽黑水惟梁州曰梁
 州界自華山之南至於黑水也觀此則黑水又在華山之
 南若以雲南徼外之喀喇烏蘇當之其說亦合總之禹貢
 明言華陽黑水惟梁州又云黑水西河惟雍州二州一南
 一西相去數千里皆以黑水紀其疆域則水之大可知導
 川之黑水明言至于三危入于南海則三危去南海當近
 而敘三危既宅于雍州之域則三危又不得在梁州此古
 註所以云三危在鳥鼠之南也然則黑水互雍梁二州當

時導黑水由三危西去使入南海其時水道必有可入之
 理古今數千年水道變更多矣不得以後世水道疑之也
 諸說紛紛存之備考可耳

右甘肅黑水
非禹貢黑水

地理今釋按黑水之辨諸家紛如今考地圖禹貢之黑水
 有三正不必強合水經注所謂黑水出張掖雞山今甘至
 於燉煌今廢沙州此雍州之黑水也漢書地理志犍爲郡縣南
 廣注云汾關山符黑水所出南廣今南溪縣北至犍道入江今敘
 唐樊綽亦以麗江爲古黑水云羅些城北有三危山羅些
今麗江府北境其水從山南行上流出吐蕃界薛季宣謂瀘水爲
 黑水今打沖河引酈道元說黑水亦曰瀘水卽若水出姚州徼
 外吐蕃界中山海經黑水之閒有若水是也以麗江之說
 爲非不知打沖河至大姚縣卽合金沙江會流入岷江薛

氏之說原與漢志相合此梁州之黑水也宋程大昌以瀾
滄江爲黑水李元陽黑水辨亦云隴蜀無入南海之水惟
滇之瀾滄江足以當之而元史載勸農官張立道使交趾
竝黑水以至其國吳任臣山海經注亦以瀾滄爲古黑水
此導川之黑水也蓋雍州之黑水其源在黃河之北梁州
及導川之黑水其源皆在黃河之南有截然不紊者第以
張掖燉煌尙在內地可以尋源而求而推其委不得遂託
爲越河伏流之說夫崑崙爲地軸其山根連延起頓包河
南接秦隴直達長安爲南山黑水自燉煌而南縱可越大
河之伏流其不能越河以南之南山也明矣若徂於雍州
三危旣宅之說此是言雍州分域以內今終南烏鼠皆在
河之南而三危更在烏鼠之南其與雍州之黑水又何涉

耶然主瀾水麗江瀾滄之說者亦皆以意度未能確指水
之分合不知瀾水麗江源異而流同麗江瀾滄源近而流
別分合言之梁州之黑水有兩支而與導川之黑水實出
一地也而古未有及之者蓋以二水僻在蕃界隔蔽南山
阻輿從古未通中國魏之法顯唐之元奘元世祖之南征
邱處機之西游皆繞出崑崙以外歷西域諸國至於滇南
總未嘗經其地但從入中國之支流以古今分域配之料
約爲某水某水而已今海內一統西南徼外咸入版圖爰
遣使臣徧歷其地究源討委寫圖以誌支派經絡瞭如指
掌諸家浮說有所折衷矣

右禹貢黑水有三

十八日由濟嘉木參來見告辭啓行赴察木多余詢其過
乍雅有無延雷答未能定諭以爾數年不歸今週所轄地

方豈無公事應部署者惟此次遵 旨赴訊應蚤至察
木多不便遲延同丁別駕賞之而去 右曲濟嘉木參
啓行

十九日晴霽偕丁別駕發裏塘西行路頗平廣數里過湯
泉在道北小岡阜之下有浴池二十里過河有大木橋本
年新修者過橋迤邐上山三十里岡巒重疊人馬皆在亂
石中行赤棘高丈許叢生遍地崎嶇聖礙艱苦殊甚馬旣
屢蹶人輿亦數覆焉衛藏圖識云此山名阿喇枯桑峻嶺
層崖日色與雪光交燦今雖四月雪消過半而殘雪日光
猶相映射申刻至頭塘在山坡平坦處結屋數間爲往來
棲止無人戶惟塘兵數人而已蕃名其地爲額四奔松館
舍敞斜欲圯宿者有戒心焉余與宣太守捐數十金交黃
明府囑修葺之是晚雪 右額四奔松

裏塘土司轄地數百里正南百數十里爲瓦述茂了土司
又數十里卽雲南中甸界又三百餘里卽麗江府治矣其
西有無量河卽麗江東入金沙江 右裏塘土司轄地

二十日曉起大雪迷山人馬冒雪而行爲一律云四月今
逾半蠻山雪正飛馬牛毛蹄蝟男婦毳重衣怪石欺人立
童山讓棘肥行行明霽色萬里亂光輝四十里至乾海子
輿中茶憩自裏塘至此童山怪石草木全無牛馬皆飢過
乾海子半里始見青草貼地更十數里上下層巒疊嶂樹
木交參泉流百匝天日晴霽山上積雪時有時無盤旋五
折至刺麻雅山過拉爾塘四山霽雪全消時而震雷忽雨
旋復日出小河迴轉數十道申刻至刺麻雅熱傲率蕃民
十數來迎宿蠻寨中地頗平曠前後蕃民約二三十戶儼

然富饒矣

右刺麻雅

士大夫好爲明哲保身苟不衡以義則孔光張禹譙周馥道之流比肩接踵於天下矣士大夫好養生之術豈知單豹八十如處子稽康親箸養生論一則終爲虎食一則身遭刑戮乎士大夫好言先幾避亂余見嘉慶年間江西湖北訛言有亂士大夫多移家江甯然其故里三十餘年晏然無恙也道光二十二年英夷舟入長江一時江甯僑寓之家皆紛紛奔走故里喪失殊多豈不徒多往返耶嗟乎世人營營逐逐無非禍福利害四字錮結胸中耳苟知死生有命何如省己守義之爲得哉

右明哲保身當衡以義

二十一日入山緣澗上下三十餘里皆無草木過嶺乃見深林密箐水草遍地午刻至二郎灣地頗寬平而破獨前後相望人戶絕少惟塘舖漢兵三人蠻兵數人而已此非宿站曲濟嘉木參昨夜止此換烏拉今日宿竹登三壩故同丁別駕止此待之

右二郎灣

丁別駕言嘉慶中歸安袁家匯有村人幼而蠢愚其家中資衣食不知好惡臥以美衾皆手碎之或臥豚圈側賊夜竊豚更爲賊驅其豚使去人莫不以爲愚而弄之然有言必中父本沽酒爲業作酒必問愚者獲利多寡而後置麩粳十不失一愚者不識字人或問節氣以指輪算之曰某日當某節氣未嘗不與曆書符合也有應童子試者問曰某今年入泮否愚者應之曰來歲已而果然鄉人患火置水龍廟中而繙其室愚者一日忽斷其鎖取龍頭出舞於市羣詭之還諸廟不三日市中火災乃知其異別駕徐

訪之見於佛寺中村人方環弄之使劬斗為戲愚者年二十許矣體頗豐壯即於石地上為劬斗以笨重輒仆羣大笑為樂別駕試以何日清明愚者輪其指答曰昨日也果然若此者其殆隱仙乎余曰是人也蓋誠於天者受人受天地之氣而生惟得一則誠誠則明而幾於神矣今夫龜蠶物也然而卜者問之吉凶禍福其應如響鵲小鳥也望氣知人家之衰旺營巢知天風之嚮避物固有然矣是其知也得之於天者純一易嘗有師授之而勤學之哉惟能葆其純一而不雜以人智故能不失其知彼愚者不識美惡故能有所知惟誠故也使愚者衣服飲食起居一如人有嗜好焉則失其知矣中庸曰至誠之道可以前知釋氏云一入凡情五通俱失

後漢清于恭家有山田果樹人或盜竊輒助為收採則有心驚俗非

愚者比也

右歸安愚者

萬物之生皆二氣之動使然方其寂也若無所知覺及其動也知覺即隨之而生飛潛動植之物無不有知非特人與鳥獸昆蟲鱗介也草木之榮枯山峙川流蘊生萬物非其知乎草木其細山川其鉅耳萬物能守其知者惟無七情無情故不以其知徇人人常味其知者惟有七情有情故不能以其知自保

右守其知者無七情

二十二日登山緣河上下迂折五十餘里過木橋三未刻至立登三壩巴裏二塘交界處也有漢蠻塘兵各數人巴塘熱傲率小蕃來換烏拉是晚彤雲深布雪意甚濃

右立登三壩

二十三日晨興大雪未已犯雪登巴山行三十餘里頗平

坦衛藏圖識云上有海子未見下山則青松彌望紅日近
午矣地名松林口一路十餘里穿林而行道旁二樹花一
朱一白葉似枇杷花皆一幹數朵每朵攢十數小花狀如
臘梅磬口檀心特色非黃耳詢其名曰達麻花也爲長句
以賞之云蠻方風景日日殊人物詭異形難模千山石樹
萬山雪一花如見傾城姝達麻之種經所無葉如枇杷青
更腴朵開合抱花十數深紅淺白聊可娛檀心磬口瑩裳
裾臘梅方之色不如老夫倦眼行模糊綠衣紅袖相迎扶
遐荒憐汝苦寂寞野鴿朝暮空飛呼
右松林口達麻
花
未刻至大所塘一作大朔巴塘土司遣蕃日來迎賞以茶
物遣回大所地寬闊水草青肥三面土山山上石壁峭聳
奇峯異筍色多斑駁甚可觀也倚山蕃戶數十家設漢蠻

塘兵各數名

右大所塘

唐詩人溫李皆得罪時相被摺終身當時至以爲戒目爲
輕薄然考其得罪之由不過語言文字之小故耳令狐綯
身爲宰相不自咎其不學反恨飛卿直言義山乃其至戚
又其父所賞識也綯既不加存錄反因九日題詩而大恨
之此其褊狹忤忌爲何如論者不責時相之忌才但咎溫
李之輕薄是必以貢諛逢迎者爲厚重載福矣此等議論
正由重視宰相輕視人才使令狐綯而賢者知過能謝更
加禮於溫李不當又以二人爲氣節之士耶若夫狹邪之
游纖靡之作乃唐代習俗巨公多不能免人品邪正固不
存乎此也唐文皇纖麗之詩不如隋煬帝長城飲馬之什
而李林甫盧杞之不遜聲色豈賢于郭汾陽白香山韓偓

唐書卷之四
右潘李得罪時相非其罪

唐人好爲小說率多不見其全宋時載入太平廣記者猶百數十種可見當日文士喜於記載然不甚決擇多出好惡之口不可遽信博學篤志者殆不易得宋以後乃稍決擇然亦不免好惡之偏求其是非得失稱量而書一論於大公至正者亦寡矣一言爲知徒徇一己之好惡不顧事理是非幸而其書不傳已耳苟其傳之徒爲識者所識豈非自暴其不知乎載筆誠不可不慎也

右唐宋人小說

二十四日沿溝行輿甚逾大雪山山谷遶峯高積雲盈尺樹木交橫亂石遍地泉聲刮耳三十里至山嶺鳥道羊腸殆不足喻也下山三十里亦如之人馬疲殆停輿坐看塊折松枝煮澗水啜茗半甌復進迤邐曲屈十餘里過崩寮木

有蠻塘兵數人迎於道左又二十餘里乃至小巴冲山谷閉結蠻寨七八戶巴塘副土司索諾木袞布率衆蕃目來迎

右小巴冲

二十五日沿山溝行澗水皆西流上下三十里林谷幽窈過大木橋二山谷豁然開朗則已至巴塘矣巴塘地土饒沃青稞小麥併種惟無大米耳天氣暄和四時與內地無異三四月閒亦有牡丹芍藥二種余來時花皆過矣地有都司及糧臺文武二員土官正副宣撫司二員正土官以年班入京未回大頭人護理正土司事副土司索諾木袞布能漢言識漢字堪布來見以乍雅大胡圖克圖從未過此求畱住誦經三日整烏拉曲濟嘉木參來見亦言巴塘僧俗之意許之

右巴塘

自打箭鑪至小巴冲地氣皆寒節近芒種衣必重裘及至巴塘始覺暄暖可著棉衣矣衛藏圖識云打箭鑪外折多山產大黃藥氣蒸蒸使人氣喘以余所經不獨折多為然裡塘尤甚蓋自折多至巴塘乃止良由水性寒重使人氣下之故非關大黃也裡塘有湯泉巴塘亦有之皆地產硫磺與大黃之性相反何嘗數百里皆產大黃耶

右裏塘氣

巴塘西即藏界舊屬拉藏罕有大刺麻寺一座達賴刺麻委堪布一名掌理黃教拉藏罕委第巴二名管束地方康熙五十七年護軍統領溫普大兵入境至大湖第巴赴營投誠五十八年獻寨落三十三處土目二十九人蕃民六千九百戶刺麻二千一百人納糧承應差徭五十九年定

西將軍至巴塘蕃民竭力隨軍轉運雍正四年會勘界址歸滇歸川歸藏分定疆界於南墩適中之甯靜山頂建立界碑又於喜松工山與達拉山兩界山頂亦立界石山以內均為巴塘所屬山以外為西藏所屬雍正七年授巴塘土官札什彭楚克為宣撫司大頭人阿旺林沁為副土官頒給印信號紙凡土目二十五名大小頭人四百二十六人蕃民二萬八千一百五十戶刺麻九千四百八十八人每年上納折銀三千二百兩有奇所轄安撫司十一長官司七右見和泰庵西藏賦注余按康熙五十八年第巴呈獻巴塘蕃民六千九百戶刺麻二千一百人至雍正四年僅七年耳乃蕃民遂至二萬八千一百五十戶刺麻九千四百八十名多逾三倍蓋初呈獻時猶多未盡也以此見巴

康輦紀行 卷之四
塘富庶過裏塘遠矣至今二塘氣象猶迥不同蓋地氣一
苦寒一溫暖故也

右巴塘規制

武侯五月渡瀘瀘水所入卽今之大渡河也按今地輿圖
大渡河水源出於松潘廳西北二百五十餘里物藏轄漫
二土司境內南流三百五十餘里爲大金川河南經綏靖
崇化章谷三屯小金川河自東北經撫邊懋功二屯來會
始名大渡河西南流七十餘里有巴的河自打箭鑪東北
會打箭鑪河東流入之南經冷邊沈邊二土司境有什丹
河自西來入又南流至松林地土司境有老鴉漩河自西
南來入自此乃東流六十餘里有清溪縣之流沙河自北
來入又東流百餘里越雋河自西南來入東過峩邊馬邊
二廳峩眉縣境南謂之陽江又東二十餘里至嘉定府樂

山縣乃入岷江矣蓋大渡河卽古若水瀘水自越雋南來
入之武侯當日南征所渡之瀘水卽此水也故今清溪縣
東北有山土名大相嶺自清溪縣東南至甯遠府有山土
名小相嶺皆以武侯經過得名蓋自成都南行界隔華夷
之水莫大於此故武侯舉以言之若今之瀘州乃在成都
東南大江之北若過此而南當云渡江不得云渡瀘矣不
知後來何以名州也

右瀘水通大渡河

甘肅洮州之西三百餘里有西傾山卽禹貢之西傾因桓
是來也又西南一百餘里爲積石山當日導河始此更西
南七百餘里卽喀喇烏蘇河是洮州距喀喇烏蘇河僅千
餘里耳黃河在其北喀喇烏蘇在其南以此爲雍州分界
固自瞭然故云黑水西河惟雍州是可見禹貢時雍州境

兼陝甘二省且及青海一帶羌戎地矣

右古雍州境兼陝甘青海

洮州外河名大夏者以通古大夏國得名國名大夏疑以夏禹治河自大其國如西海之大秦國也大禹治水功莫盛於西陲故西戎皆稱中國爲夏至周末孔子猶言諸夏及漢武以後窮兵湖漠匈奴畏之至今蒙古皆稱中國爲漢人唐高宗元宗之世再下高麗南平六詔武功又莫盛於東南至今東南諸夷稱中國爲唐人皆從其功之盛者稱之也

右河名大夏

庸蜀羌髳自古列於要服周武王孟津之會八百諸侯有其人矣大禹塗山之會執玉帛者萬國周末蜀乃不通中國余意蓋自平王東遷失諸侯始也及秦孝王伐之乃復通始皇因置蜀郡自是代有增建然猶未盡郡縣之也以

今輿圖考之四川總督治成都府領府十二直隸廳六直隸州八廳六州十一縣百有十一其大小金川古稱化外者亦置五屯可謂盛矣然北至龍安西北至松潘西至雅州南至甯遠此外爲土司者二百六十有九土司屬地或大於郡縣豈不以地形險阻種族殊異之故歟今土司之地漢人日漸繁多蕃夷漸慕華風更千百年皆將用華變夷勢使然也又考甘肅九府六直隸州九廳七州五十一縣而土司之地四十二廣西十一府一直隸州五廳十六州四十七縣而土司之地四十六雲南十四府三直隸廳四直隸州九廳二十七州三十九縣而土司之地五十貴州十二府三直隸廳一直隸州十一廳十三州二十四縣而土司之地八十一是知天朝撫育萬方惟在安其

人民初非貪其土地但使靖我邊陲不遽易其風俗卽封疆以內不妨從事羈縻更無論邊徼外矣

右五省土司地制

今輿地圖青海之南有達賴商上堪布刺麻牧場其西二百餘里有班禪商上堪布刺麻牧場地去前後藏甚遠何以牧場在此竊意前藏之亂達賴移居西甯塔爾寺時之牧場也西甯去青海裁三百餘里固宜有之達賴回藏後遂相沿不廢耳傳記未言班禪移居西甯之事何以青海亦有牧場又按圖內肅州之北五百餘里卽瀚海瀚海北五百餘里有額爾德尼班第達刺麻游牧烏里雅蘇台之南稍東三百里有尼魯班禪刺麻游牧又東北四百餘里有青殊克圖刺麻游牧又青海達賴刺麻牧場之南百餘里有察漢諾們罕刺麻游牧其地去甘肅貴德廳僅一百餘里何刺麻游牧之多也良由西蕃崇信其教所在各以地予之青海一帶距藏遼遠故隨處設刺麻鎮撫猶之設官綏靖邊域耳

右刺麻牧場

乍雅呼圖克圖之去裏塘也堪布率眾刺麻寺餽銀百金茶二千五百斤正副土司餽銀百金茶一千五百斤各鄉蠻民供烏拉牛馬二百四十頭馱載人物外更饋銀五十金茶七百五十斤行過巴塘堪布及眾寺刺麻款住五日復饋以銀茶馬匹正副土司亦然其敬禮之如此余細詢呼圖克圖亦食牛羊衣狐羊諸裘初無異人處惟夜坐不眠所習經典較多耳巴塘刺麻寺眾少於裏塘經板亦在裏塘刷印而來堪布亦如內地地方丈自三品至八九品視所管寺院刺麻大小多寡爲差

右巴裏二塘餽呼圖克圖

巴塘四面皆山中開綠野平疇周約三十數里青稞小麥
彌望葱秀所居行館依近東山面西正副土司署皆在其
北都司無署僦民房居之蠻民數百戶有街市皆陝西客
民貿易于此舊有蠻城隍廟神像戎裝近建漢城隍廟及
關帝廟其西山一帶則皆刺麻寺糧務署在寺內行館頗
高潔可時眺望全塘在目儼如內地心神爲之一怡

右巴塘風景

唐元宗崩于肅宗寶應元年壬寅年七十八上溯當生於
武后垂拱元年乙酉中宗景龍四年庚戌討韋氏之亂年
二十六睿宗太極元年壬子八月內禪年二十八開元二
十三年乙亥爲壽王册妃楊氏天寶四載乙酉以楊太真
爲貴妃是時帝年已六十一矣楊氏以乙亥年册爲壽王
妃年少亦當十五以上更十年爲貴妃當亦二十五六歲
十五載丙申死于馬嵬蓋三十七八歲也安祿山出入禁
中爲兒在天寶六載丁亥楊氏年未三十元宗甫六十三
歲何其昏聩乃爾耶計楊氏濁亂宮闈八年而祿山反十
年而身死楊氏死元宗年蓋七十二回憶討韋氏時四十
七年耳自古人主一身前後異轍未有如元宗者也
右唐元宗楊妃年歲

狄梁公之事武氏前人議者衆矣皆以反周爲唐大其功
或以事武氏爲屈其節未有知其用心所在也余嘗推而
論之方高宗之未崩也親以朝政授之武氏天下稱爲二
聖久矣中宗庸闇武氏蓋深知之故甫立而廢更立豫王
夫以母廢不才子別立一子不可爲武氏罪也其罪在

元立武氏七廟耳然改元三年固嘗歸政豫王則未有移
唐社稷之意也未幾復稱制蓋睿宗中下之材與中宗無
甚大異武氏覺其不能勝任故復自爲之然後羣小爭進
邪言武氏惑之乃大殺唐宗室矣拜洛受圖矣服袞冕大
享神宮矣前後殺三宰相矣除唐宗室屬籍矣改正朔改
國號改宗廟稱皇帝矣然猶以豫王爲皇嗣改姓武氏固
未欲自絕其子不予以天下也是時也唐胄存亡如一髮
耳仗義討罪非無其人前有李敬業後有琅琊王冲越王
貞皆舉兵不克則武氏材智實有大過人者矣勢不可爲
懷忠抱義之士惟有潔身去耳然身則潔矣其如先帝六
尺之孤何哉苟無人焉以其身冒不韙之名委曲調護之
則廬陵王及豫王者不喪于武氏必喪于三思承嗣之手

唐室不其終絕矣乎昔屠岸賈之攻趙氏也程嬰公孫杵
臼皆趙氏之忠相與謀曰殺身易乎存孤易乎嬰曰殺身
易耳存孤實難杵曰然子強爲其難者嬰乃自埋身滅
迹蒙歷艱難卒存趙氏天下皆服嬰之義而大杵曰之功
駱賓王之討武氏也爲檄文曰一杯之土未乾六尺之孤
何託武氏讀檄至此瞿然而起是母子天性固未泯也梁
公窺其微知天下之猶可爲也故毅然以二王爲己任焉
武氏亦知其忠于二王也二王者非他人子固己子也故
深諒而信任之卒從其勸召還廬陵王未幾武承嗣死廬
陵王爲太子豫王爲相王名分旣正天下人心亦定而梁
公之志遂矣所未竟者不及身奉廬陵王卽位復唐國號
身先卒耳身不及爲者復薦五人成其志夫何憾乎若狄

梁公者卽程嬰杵臼存孤之心不惜屈其身以成義而事勢之難且十倍程嬰焉孟子曰大人者言不必信行不必果惟義所在孔子曰豈若匹夫匹婦之爲諒也梁公可與立矣復可與權非折衷孔孟安能知大人之義乎哉

右狄梁公大人之義

東坡九月二十日微雪懷子由詩岐陽九月天微雪已作蕭條歲暮心又云白髮秋來已上簪按公是時爲鳳翔府簽判甫二十六歲乃有白髮之句又病中聞子由得告不赴商州詩云流年冉冉入霜髭子由時年二十四耳遂作霜髭語耶余向舉杜韓二公詩文皆以壯年作老人語此則未及三十之年而已如此蓋坡公是時方與陳公弼不洽子由又爲安石持告敕久之不下大都牢落昂藏之言

不必實有其事與杜韓微不同也

右坡公少年作老詩

宋仁宗時王倫及羣盜剽掠淮南將過高郵知軍晁仲約度不能禦諭富民出金帛具牛酒使人迎勞且厚遺之盜悅徑去不爲暴事聞樞密副使富弼議誅仲約參知政事范仲淹欲宥之爭于帝前弼曰盜賊公行守臣不能戰守而使民隳錢遺之法所當誅不誅則郡縣無復肯守者矣仲淹曰郡縣兵械足以戰守遇賊不禦法所當誅今高郵無兵與械雖仲約之義當勉力戰守然事有可恕戮之恐非法意帝釋然從之時歐陽修爲諫官言臣竊見近日盜賊縱橫蓋由威令不行如淮南一帶官吏與王倫宴率民金帛獻送開門納賊道左參迎苟有國法豈敢如此而往來取勘已及半年未能斷遣遂致張海等官吏依前迎奉

順陽縣令李正已延賊飲宴宿于縣廳恣其劫掠鼓樂送出城外其敢如此者蓋爲不奉賊則死不奉朝廷不死所以畏賊過于畏國法伏望陛下勿行小惠以誤大事又言臣聞議者猶欲寬貸此由權要之臣多方營救不思國體但植私恩惟陛下以天下安危爲計出于聖斷以厲羣下其晁仲約等乞重行朝典瑩按慶曆君臣極一時之盛而仁宗寬厚又懲遼夏用兵無功反增歲幣積弱之形已成遂一切爲姑息之政耳范公寬厚一德曲貸有罪不可謂非賢者之過也是時韓公不在朝中使其在朝當與富歐同議惜方巡邊希文一意弛刑宋之終于不振也宜哉長編載仲淹告弼曰吾與公在此同僚之間同心者有幾而輕導人主以誅戮臣下他日手滑雖吾輩亦未敢自保也此恐傳聞之言似不足信若爾則范公竟以私心廢法矣更成何語耶雖然當時亦僅宥之不誅而已未以其克全境土爲功而賞之也以仁宗希文之寬厚猶不出此此北宋所以猶能立國也歟

右宋代弛刑

明嘉靖十二年閣臣夏言樞臣王憲等議西域稱王者止土魯蕃天方撒馬兒罕如日落諸國稱名雖多朝貢絕少宏正閒土魯蕃十三人貢正德閒天方四人貢稱王者率一人多不過三人餘但稱頭目而已至嘉靖二年八年天方多至六七人土魯蕃至十一二人撒馬兒罕至二十七人今土魯蕃十五王天方二十七王撒馬兒罕五十三王實前此所未有宏治時回賜敕書止稱一王若循撒馬爾罕事類答王號人與一敕非所以尊中國制外蕃也蓋帝

康輿紀行 卷之四
王之馭外蕃固不拒其來亦必限以制其或名號僭差言
詞侮慢則必正以大義責其無禮今謂本國所封何以不
見故牘謂部落自號何以達之天朝我槩給以救而彼即
據敕恣意往來恐益擾郵傳費供億竭府庫以實幣壑非
計之得也帝納其言國止給一敕且加詰讓示以國無二
王之義十五年入貢復如故甘肅巡撫趙載奏諸國稱王
者至一百五十餘人皆非本朝封爵宜令改正且定貢使
名數通事宜用漢人毋專用色目人致交通生釁部議從
之余謂外蕃之敢爲姦詐欺中國者以中國無人留心徼
外事也苟每因其來有人焉訪其山川疆域國制民風互
相考校久之必得其實則彼一有姦欺我有所據以折之
彼知中國有人自可銷其邪慝惜乎明代諸臣徒知防其
詐僞而不知講求方略內而中樞外而邊臣皆不習地形
不曉夷情一旦有事惟相與震驚如鬼魅雷霆以爲不可
究詰罕不望風披靡者深可悼歎也夫明史言永樂十三
年使人陳誠自西域還所經哈烈撒馬兒罕別失八里俺
都淮八答黑商迭里迷沙鹿海牙賽藍渴石養夷火州柳
城土魯蕃監澤哈密達失于卜花兒凡十七國悉詳其山
川人物風俗爲使西域記以獻故中國得考焉是明初猶
有留心此事者後乃絕少陳誠之書亦亡修明史時檢討
尤侗撰外國傳徒知鈔襲王圻續文獻通考而王圻又本
于明外史今明外史四庫書目固已無之僅見于圖書集
成所引 右明臣議撫馭外夷

康輜紀行卷之四 終

康輜紀行卷之五

桐城姚瑩展和甫

本朝武功莫盛於西北自內外蒙古青海回疆西藏皆入
 圖籍學人皆得以披考之矣惟東南島夷雖見四裔考及
 傳記苦不明了海國聞見錄海島逸志頗有圖說亦但據
 海舶所經圖之而海岸諸國及在陸諸國何者接壤孰為
 東西孰為遠近無從知之幸有西人艾儒略南懷仁所刻
 坤輿圖可以得其形勢蓋卽利瑪竇萬國全圖而為之也
 惟方音稱名與中國傳說諸書各別某卽某地殊費鉤稽
 道光二十二年奉 命卽諸夷囚問英夷及俄羅斯遠
 近當以夷酋顛林等所繪近海諸國地名形勢錄供為說
 覆奏倥傯軍旅之中未能詳加攷訂也第就其所繪圖取

海國聞見錄與南懷仁二圖較之形勢實相符合嘗欲以此三圖參互攷訂於其地同名異者逐一詳辨之旋為北逮不果友人邵陽魏默深得林尚書所譯西洋四洲志及各家圖說復以歷代史傳及夷地諸書考證之編為海國圖志六十卷可謂先得我心余嘗得英夷圖書數部皆方志也苦無人翻譯覽之茫然顛林言伊國海船無不齎方志以行蓋備風飄至未經之國以所見天文度數及人物山川稽之可知其為某國也倘至粵中以其書覓人譯而出之不亦善乎

右外夷形勢
當考地圖

七椿園西域聞見錄余三十年前即見之所錄外蕃之國十八日哈薩克曰布魯特曰安集延曰博羅爾曰敖罕曰温都斯坦曰克什米爾曰巴達克山曰退木爾沙曰沙關

記曰塞克曰鄂羅斯曰控噶爾曰郭罕曰退擺特曰轄里薩普斯曰哈拉替良曰布哈拉絕域之國十五日瑪轄提為一大國曰安他哈爾城曰看他哈爾城同一部落曰賽拉斯城曰查爾丹衣城同一部落曰噶拉特城曰查納阿拉巴特城曰摩勒城同一部落曰烏爾古特雅爾為一部落曰盤家戡特城曰耐爾海城同一部落曰巴喇哈為一大國曰科罕為一國曰阿穆爾城曰哈拉多拜城曰巴拉城曰哈喇他克城同一部落曰葛爾洗為一部落曰薩穆曰阿拉克曰哈他木曰阿諦各為一國曰扎拉巴特城曰色里丹衣城曰別什克里城曰阿色里巴拉城同一部落余按外蕃諸國惟温都斯坦及克什米爾在葉爾羌西南多江河近通海洋時有閩廣商船至其地餘皆在其西北

最大者為鄂羅斯鄂羅斯即俄羅斯東北界海南鄰中國西北鄰普魯社東西距二萬里南北千里至三千里不等以南懷仁陳倫炯顯林三圖觀之已接近西洋諸國矣溫都斯坦克什米爾二國所通之海蓋即南海其地在印度與英夷所據烏鬼之地孟加刺及望邁等處相近克什米爾即陳倫炯圖內之克什米爾也其絕域諸國中以瑪轄提巴喇哈薩穆阿拉克為最大而瑪轄提之銅礮薩穆之居室修潔阿拉克之人多巧思皆類西洋人其為地近西洋諸國又可知矣所言阿諦國人長三四丈婦女一如常人則又即海國聞見錄所言之長人國也惟言俄羅斯西北又有控噶爾國地包俄羅斯外云云大謬松相國及魏氏書皆辨正之

溫都斯坦之溫當依今會典作痕都斯坦

右西域聞見錄

七椿園謂回人文字有醫藥之書有占卜之書有堪輿之書有前代紀載之書有各國山川風土之書余嘗至英夷舟中見其會室內列架書籍殆數百冊問之所言亦與回人相似而尤詳於記載及各國山川風土每冊必有圖其會雖武人而猶以書行且白夷泛海習天文算法者甚眾似童而習之者益專為泛海觀星以推所至之地道里方嚮遠近必習知此乃敢泛海航縱所之也吾儒讀書自負問以中國記載或且茫然至於天文算數幾成絕學對彼夷人能無泚然愧乎

右外夷講圖書

住裏塘二十餘日食無蔬菜閒有為豆腐者四方三寸值銀二分或易以黃煙一包余與宣太守丁別駕隨行弁兵輿夫丁役殆百人月屠一豕而分之或有饑蔬菜者皆齋

自他處數百里外及至巴塘則有青菘蘿白萵筍可日充
庖饌矣有河魚尾可一二斤豬肉可閒日市買羊亦壯時
近端午富都闔餽食物蒸豚熟雞外猶以青菘蘿白萵筍
為禮居巴塘者亦不能食此物也巴塘有售木耳者甚肥
而脆較內地白耳黃耳尤美產巴塘所屬之空子頂每斤
值銀一錢五分 右巴裏二塘食物

南懷仁所刻坤輿全圖本為二圖每圖圍圓一丈五尺國
名島名山川人物風俗皆注之字細如蠅頭余取其國土
山川之大者縮為小圖臺人併陳倫炳顛林二圖刻之附
余覆奏顛林圖說矣其艾儒畧南懷仁諸說余亦為錢出
意欲取凡外域之書蒼萃刻之名曰異域叢書俾究心時
務者有所考鏡而見聞未廣尚待蒐討今魏默深有海國

圖志之作余可輟業矣 右坤輿全圖

衛藏圖識載西藏外蕃民部落一曰阿里噶爾波在藏地
之西與後藏扎什倫布三桑接壤即古北印度屬也其蕃
民帽高尺餘尖其頂類回子帽形以錦與段為之縵不甚
寬頂綴緯婦人帽如笠以珠下垂前後如旒密遮面項著
圓領大袖衣繫褐裙見官長不除帽惟以右手指自額上
念唵嘛吽者三余按英夷見其國王免冠以手拔其額上
毛三莖投之與此意同即稽顙叩首之意爾阿里部落地
不小於後藏在葉爾羌南後藏之西今輿圖有之二曰木
魯烏素部落在藏之北稍東與西甯接壤余按今輿圖前
藏東北駐藏大臣所轄三十九族之外逾阿克達木山北
三百餘里有木魯烏蘇河西自巴薩通拉木山東入玉樹

土司界此所云木魯烏素蕃民似卽其地以烏蘇爲烏素
音之訛也然自此東至西甯尙一千數百里中隔玉樹土
司土爾扈特青海諸地調與西甯接壤者玉樹以東皆西
甯大臣所屬耳三曰布魯克巴部落在藏地之西南本西
梵國屬雍正十年始歸誠其地和暖物產亦與中國相似
南行月餘接天竺國界其蕃民披髮裹白布如巾幘然著
長領褐衣披白單手持念珠婦女盤髮後垂加以素冠著
紅衣繫花褐長裙肩披青單項垂珠石纓絡圍繞至背俗
皆皈依紅教崇佛誦經余按此言南行月餘接天竺國界
似卽東印度也蕃民頭裹白布類白頭回子但回子不奉
佛教未知孰是四曰狍狽茹巴野人在藏地之南數千里
其人名老卡止荒野蠢頑不知佛教嘴剖數缺塗以五色

性喜食鹽不耕不織穴處巢居冬衣獸皮夏衣布葉獵牲
並捕諸毒蟲以食衛藏犯罪至此者解送怒江羣老卡止
分而啖之余按旣云怒江則與緬甸鄰矣怒江有怒夷不
知卽此種否但藏地治囚死罪旣送蝎子洞何又越數千
里解送狍狽耶此說恐有悞五曰巴勒布卽巴爾布亦名
別蚌子在藏地西南與聶拉木接壤原注卽尼雅爾木計程幾兩
月天道和暖產稻穀蔬果綉段木棉孔雀向有三罕一曰
布顏罕和泰菴西藏賦作布彥二曰葉楞罕三曰庫庫木
罕雍正十年遣使內附嗣爲其族廓爾喀所併其羣民皆
薙髮蓄小辮聯鬢短鬚似西甯回鶻額塗白土二豎眉間
塗紅土一丸用金珠鑲花墜兩耳以布纏頭賤者以青貴
者以紅著青白色小袖衫以布束腰踏尖頭革鞮佩短刀

狀如牛角挽黑漆藤牌徑約三尺婦人披髮跣足鼻孔穿
 金銀圈亦梳洗尚潔乾隆五十三年廓爾喀會喇納巴都
 與西藏以六易構兵六師遠涉震讐投誠遣使入貢至今已
 五十餘年貢道由川入陝至京師川人猶稱為別蚌子沿
 其舊也廓爾喀在後藏正南聶拉木及濟隴界外其東北為
 哲孟雄作木朗洛敏湯三部皆為廓爾喀所并其南即東
 印度也今為英吉利所據魏默深云廓爾喀界西藏及俄
 羅斯攝兩大國之間故內貢中國亦兼貢俄羅斯近日英
 夷西與俄羅斯構兵爭達達里之地其地橫互南洋俄羅
 斯得之則可以圖併印度故與英夷血戰雍正五年俄羅
 斯攻取西藏西南五千里之務魯木以其地尚佛教遣人
 至中國學刺麻當即與廓爾喀相近余按魏此言恐悞俄

羅斯攻取之務魯木在西藏西南五千里外蓋西北印度
 之間其中尚隔中印度東印度今皆為英夷所據廓爾喀
 何由越英夷貢俄羅斯耶乃謂近俄羅斯非也

右西
藏外

衛藏圖識又云由後藏塞爾地方行十餘日交白木戎界
 再半月至宗里口山崖壁立往來者必以木梯度之又數
 日始至白木戎住牧地所屬種類繁多一名蒙身著布衣
 不遵佛教一名總幼時即以五色塗成花面一種名納昂
 男女俱不著衣禪下以白布纏之臥時以木為枕一種名
 仍微男著短衣齊膝婦亦以布遮其下重著禪不著上衣
 惟白木戎男婦皆披藏綢偏單行坐必佩刀其地和暖出
 產稻菜青稞豆麥蔬菜大羯羴羊大耳豬崖羊野象獨角

獸亦呼爲小西天地連朱巴中以巴隆江爲界白木戎東至朱巴南至西天烏盆子西至白布北至日蓋子曰蓋子者札什倫布仍仲甯翁結巴寺之後山也由白木戎西去十餘日交小西天界再行十餘日始至小西天從此登舟涉海約半月卽至大西天矣余按此言白木戎四至之界殊不可曉如云北至日蓋子卽札什倫布仍仲甯翁結巴寺之後山旣以仍仲甯翁結巴寺後山爲其北界則白木戎當在山之南矣山南卽後藏東西甚廣何處著白木戎耶此山長短未知若何以意度之白木戎當在後藏之西南然後藏之西爲拉里噶爾渡南爲廓爾喀白木戎更在此二國之西南去仍仲甯翁結巴寺遠矣何得以寺之後山爲其北界乎此條上文但言自後藏之塞爾地方行十

餘日至其界不言西行南行按塞爾爲後藏極西南邊界有賽達爾山在濟隴西八百餘里南卽廓爾喀也然則白木戎者其在廓爾喀之西北乎大約作衛藏圖識者未及見今輿圖第就所聞言之故有未確也此書本之四川通志及無名氏西域紀事西藏志二書皆抄本其中傳寫之訛在所不免馬少雲於乾隆末年以幕友刪采成書爲當時行軍之助盛梅溪從父官於打箭鑪復徵以所聞固不可以學人攷訂諸書論之也討論之事豈不有待於後人哉

右小西天大西天

歷代正史外夷列傳及諸方志皆必詳其山川人物風土者外夷言語不通文字各異且古今地名改易惟山川人物風土不易故以此志之雖千數百年後萬數千里外猶

可舉辨習其山川則知形勢之險易習其人物風土則知措置之所宜非如文人詞客徒資博雅助新奇也故留心

右詳考外域風土非資博雅

世務者皆於此砭砭焉
今達賴刺麻為十一輩其十輩於道光十六年圓寂相傳達賴刺麻每於圓寂時先示人以降生之處其弟子大堪布往訪得之小兒初見即能相識乾隆中乃發金瓶至藏貯數小兒名掣簽以防作偽圓寂後駐藏大臣行文各路民間有呈報生子靈異者或有徵驗藏內則遣大堪布噶布倫持達賴生前常愛用之物數事雜以他物試之其兒指取不爽或見堪布出一二語乃臨圓寂時事則令其父母攜至德慶距前藏一地名如此者或一二人或三四人駐藏大臣覆驗擇日以金瓶掣籤前七日各大寺刺麻虔誠誦

經幫辦大臣至大招行禮用牙籤書各小兒名如其數人各一籤彌封貯瓶內蓋之駐藏大臣行禮啟蓋掣取其一對眾折封既知為某小兒名則率眾至德慶迎入大招堪布日夕守護具奏入呼畢勒罕冊上命章嘉呼圖克圖至藏照料坐牀六歲學經七歲受小戒即學禪坐不令臥藏內公事皆班禪或呼圖克圖代決十六歲乃自理事達賴刺麻有金印玉寶其金印文曰敕封西天大善自在佛統領天下釋教普通瓦赤拉咀喇達賴刺麻之印玉印文同惟不稱印而稱寶又有金冊玉冊玉冊長六寸餘寬約四寸頁厚二分邊刻龍文面書敕封達賴刺麻玉冊其字四體前漢文次唐古忒文次蒙古文最後清文國書右行實則先清文次蒙古文次唐古忒文最後乃

漢文也冊凡十五頁不聯金冊大小如之亦十五頁而聯其腦如展書者矣皆紫檀座盛班禪額爾德尼有金印金冊無玉印玉冊

右達賴刺麻掣金瓶

達賴刺麻之下有二呼圖克圖一爲濟隆二爲第穆皆以所轄地名稱之濟隆在後藏之南第穆在工布又有二那門汗或作諾們罕一爲榮增那門汗榮增者梵言師父爲達賴授經之師也一爲噶勒丹錫呼圖薩瑪第巴克什那門汗其人名阿旺札布巴勒楚勒齊木洮州人先時在京師以前輩達賴圓寂至藏爲那門汗代理賞噶勒丹錫十二字名號道光二十四年駐藏大臣奏革之向例達賴圓寂以班禪或兩呼圖克圖及那門汗代理呼圖克圖較尊那門汗次之阿旺札布巴勒楚勒齊木前後代理達賴事

二十餘年跋扈不法十輩達賴刺麻之死藏人洶洶言其謀毒堪布及眾刺麻羣訴於大臣事無左驗莫能究也有不服者更以抵罪阿旺札布巴益驕黨羽日眾厚結大臣以自固至是敗竄黑龍江

右西藏大蕃僧

藏中管理寺院講習經典之僧官皆名堪布最大者曰總堪布次曰通巴堪布達爾罕堪布品級大小有差札薩克三人乃濟隆第穆兩呼圖克圖及那門汗理事之大僧官也歲臻者達賴刺麻起居之內侍也其次曰森臻又次曰曲臻職司經卷又次曰孜仲職司熬茶歲臻以下皆堪布之有職事者卓尼爾達賴之傳事者也達賴刺麻山上則金銀緞疋珍寶之內庫曰商上主庫之僧官曰商卓特巴曰仔珠皆四品商卓特巴本卽倉儲巴以諸處皆有故特

異其名其主徵收者曰業爾倉巴五品主刑名詞訟者曰噶廈曰協爾幫五品主文書者曰大中譯六品曰小中譯七品通傳譯語者曰羅藏娃主馬廠者曰達珠六品分管地方曰希約第巴曰耶仔轄第巴皆五品掌戶冊者曰密琿五品主兵者曰戴琿次曰加琿次曰甲琿次曰定琿代達賴理事者曰第巴統理兵馬刑名者曰噶布倫又作噶隆三品噶布倫凡四人格隆者戎僧也格隆之熟經典者曰格喜修行未深初轉一二世者曰沙布倫通稱刺麻弟子曰托音俗官初入籍者曰東科爾又有邊缺大營官小營官皆主地方及兵事其仔琿商卓特巴噶布倫有缺駐藏大臣會同達賴刺麻選擬正陪二人請旨補用餘皆會同揀放他如管門管草管搭帳房牛羊廠諸職

事均聽達賴刺麻自用之乾隆五十七年大學士福公奏定其制

右西藏僧俗官名

五月五日庖人具雞豚鮮魚蔬菜爲饌蟹中不易得也申刻雷雨一陣遙望山色空濛麥田青秀如在成都郭外作一絕云輕雷飛雨麥翻風山色雲光態不同憶向成都行綠野幾人蓑笠在空濛

右巴塘午日詩

初六日巴塘啟行初上小山路尙迤邐十數里後則登大山人牛曳駕屈曲崎嶇下臨長河險甚四十里至牛古停輿茶憩片刻山下河益深廣卽今輿圖內之巴楚河西流入金沙江衛藏圖識謂卽金沙江者非也河干有小木舟一皮船二蕃人乘皮船順流而駛作皮船行云皮船形製如方鞋木口藤腹五尺裁受人三四一短楫竝舟繩貫行

能借山高夾水湍流疾頃刻已過峯千迴崕呀大石偶擊
撞回旋輕輭無驚猜濶筒雖奇尙險絕此物穩迅誰所開
讀書蚤年想奇製天使譴謫殊方來殊情詭物飽經見賦
詩老矣慚非才沿山逐河又五十里至竹巴籠宿所住蕃
樓面山俯臨大河斜陽方照景物如繪

右皮船

初七日渡河登山仍傍河行崩崖下亂石如劍鋒森立陟
降之路一綫蜿蜒不能無恐四十里至公拉河稍淺輿人
涉水而過余與丁別駕皆乘馬渡水及馬腹憩古廟中觀
四壁畫神佛鬼物猙獰怖人更換烏拉西進河轉東流乃
不復見山谷約深樹木叢雜頗似麻格宗而險仄殊甚五
十里至空子頂山巔石盡綠草如茵黃花滿地蠻寨二三
十家景物閒適綠鸚鵡數十飛鳴蕃女耕夫雜行麥隴菜

畦閒恍如桃源雞犬別有天地矣

空子頂一小沙彌甚聰秀年甫十二已薙髮數載其父爲
蕃官甚憐愛之爲淨室於家供諸佛像延僧教習經典擊
鼓鳴魚誦聲清朗可聽檻外綠鸚鵡時來飛遶若有知者
爲二絕句贈之云善財幾歲得無生十地初參欲問名一
隊綠衣飛不去朝朝檻外聽經聲其二云殊方政教不相
如貴異還同釋與儒若向中華求俊秀老夫合送五車書

右空子頂二條

初八日空子頂啟行山路頗寬四十里至莽嶺勢益平遠
遙望嵐光不斷地亦坦曠河流清淺綠草黃花如鋪如襯
馬蹄輕輭如行沙堤沿途楊樹相望景物暄麗牒巴熱傲
迎於道周停輿眺覽幾忘身在夷地矣爲一絕云黃花貼

地草如茵平遠山光欲笑春怪底輕寒風撲面雪峯數點
又迎人衛藏圖識言空子頂山峻夾壩出沒莽里龍新山
多積雪余所見殊不爾惟山外數峯殘雪而已

右莽嶺

西行十餘里過邦木設蠻塘汛於此巴塘土司所屬麻本
營官之弟昂朗率蠻兵鎗馬來迎年十七八剪髮覆額紅

呢大帽綠袍圓領窄袖佩刀束金帶儀容甚都跪獻茶果
卻之過此則山形聳峻矣數里躋其巔復寬衍峯巒秀複
卽所謂甯靜山也迺遲久之見雍正五年所立界碑山以
東爲川轄山以西爲藏轄碑裁二尺字已漫滅巴塘有巡
兵數名於此山大而長東向一山如屏南北各起一峯翼
之勢如龍虎朝拱內地自打箭鑪至此未有若此山者宜
以甯靜得名也

右邦木甯靜山

裡塘至藏中間最大之水有二一爲金沙江其上源自木
魯烏素河東南流爲布壘楚河又南流至甯靜山而東有
巴楚河自東來入巴塘以此得名又南爲金沙江東南至
雲南北入四川合岷江此水之環流向內者也一爲瀾滄
江其上源自類伍齊北之恆楚河南流歷察木多乍雅江
卡過甯靜山爲瀾滄江西南流貫雲南至交趾入南海此
水之環流向外者也甯靜山在二水之中前人於此立界
有以哉

右金沙瀾滄二江分川藏界

下山迤南十餘里卽南墩達賴刺麻設台吉於江卡南墩
其邊界也台吉三年更替現爲五品蕃營官俄楮班角署
台吉事自江卡來迎率蕃目照料入境烏拉厚賞之
南墩爲川藏適中之所蕃民百餘戶有行館一漢人寺一

屋覆以瓦每年秋間巴塘察木多兩地客民雲集貿易於此衛藏圖識所云如內地廟會是也通志作湍多塘謂卽南墩有老堪布閉關習靜四十餘年蕃人崇信之貨價高下行事吉凶皆取決焉今逾九十矣僕人往問乍雅兩呼圖事云甚難十月可安靜回省須歲盡也

是夜月色甚皎潔星斗爛然忽念伯兄兒輩悽然有異域之感爲一絕云浮渡龍眠未有期錦江春色亦迷離白頭

中夜徘徊處甯靜山前月半規

右南墩三條

初九日傍山西行五十里至古樹坡路平坦閒有石山崩崩自南墩至此山下皆可耕種一路青蒿地氣暄煖故也遇巴塘糧務錢明府自乍雅查營餉返言宣太守二十六日過乍雅曲濟嘉木參昨日至江卡古樹登山盤陟十數

里而下又十餘里至普拉有行館可棲地亦沃衍與南墩古樹同沿途蠻塘舉號火以迎若烽燧然按古西域記云塞外無驛郵往往以烽代驛玉門關外有五烽皆藉烽其一也此其遺法歟烏拉皆蕃民供役刺麻無多圖識云刺麻供役以達賴刺麻所轄耳

左古樹

初十日過河山高水遠彌望清沏之氣使人心神俱曠隨行兵僕於平原中縱轡馳騁人馬爭健不覺壯念忻然日占云萬里關山度險巖衰年未肯負須眉平原淺草馳新馬一片愁心付健兒六十里至江卡有守備把總各一員與台吉駐此負山臨河蠻民百數十戶有刺麻寺地平曠對山下蠻民亦數十戶相望自古樹至此川原平沃開墾可得田萬頃足養數萬人非種塘地寒可比惜蕃戶人稀

所墾僅足終歲之食而已內地生齒日繁地不加闢觀此能無不均之歎

右江卡

西藏額設馬步兵六萬四千內分刺薩馬兵三千後藏馬兵二千阿里馬兵五千稞喇馬兵一千黨子拉雜浪木錯諸地黑帳房蒙古共馬兵五千前後藏拉里共步兵五萬皆唐古忒與蒙古之兵也散在民間征調有時無常餉乾隆五十七年改定前後藏有常餉馬兵三千惟前藏札什布城駐紮營戍兵六百餘名三年更替統以遊擊外江孜一守備定日一都司道遠餉鉅故不能多設戍兵僅備彈壓而已昔新疆之設也大小名城唇齒相接將軍參贊辦事領隊大臣提鎮數十員副將以下將備數百員哈密駐兵一千巴里坤駐攜眷滿兵一千綠營兵三千烏魯木齊

駐兵五十三百伊犁駐攜眷滿兵三千八百應役遣犯二千其環列惠遠城者巴彥帶駐兵一千九百博羅他拉駐察哈爾攜眷兵一千他爾奇城烏哈爾里克城駐屯田綠旗兵二千六百流犯千餘伊犁河南八堡駐攜眷席伯兵一千以上伊犁凡滿蒙漢兵一萬三百而攜眷者五千八百人又遣流犯漢人應役者三千撻拉巴哈台設屯田漢兵一千滿洲蒙古輪班兵一千五百關展駐兵三百五十哈喇沙拉屯田防兵二百庫車城守兵三百烏什滿兵二百漢兵一千葉爾羌滿兵三百城守漢兵六百五十有五百喀什喀爾滿兵二百五十漢兵二百五十以上各城滿漢兵又五千九百七十餘人此皆客兵也其回城本地之兵不與焉今前後藏自唐古忒兵外駐防綠營兵漢六百有

奇蒙古駐防亦不過三十九族而已所恃者唐古忒習於佛教柔順易馴耳然無事之時固爲我用一旦有事能保其心不異耶自來駐藏大臣加意戍兵惠愛之無不至定例官兵姦民婦有罪惟西藏戍兵許僱蕃婦服役蓋所以慰遠戍者之心也近歲議者以爲戍兵姦生子日漸蕃衍將漸成其種類嚴禁革除然戍兵生子皆內地種人如果繁衍是變蕃人爲我族類我之利也何謂戍彼種類乎新疆滿蒙漢兵旣眾復令攜眷以往而召墾屯田亦皆用眷戶是固欲其蕃衍矣更以流遣應役故回城有事皆得其用夫罪人以我同類尙得其用况戍兵之子乎昔西洋夷人貿易廣東例不許其住眷恐有滋生於我不利也近時英吉利求五處馬頭地我之禁必以許其攜眷爲約蓋欲

滋種於中國矣夷至中國猶謀增其種我在異域反自弱其人意殆別有所爲非顛蒙所能喻也

右西藏戍兵

凡人莫不願爲君子惡爲小人今頌人以公忠未有不喜責人以私佞未有不怒者然往往終身私佞而自不知此小人所以多也古人之事君也所寶惟賢不市已恩所退惟不肖不避已怨故大臣舉用不使人知而受舉者亦不謁謝蓋市恩則望人之私報謁謝則爲人之私人也世安有君子而望人之私報甘爲人之私人者乎蕭何刀筆吏也舉韓信不遺餘力未嘗以爲信德及信有怨望復爲呂后謀誅之張安世嘗有所薦其人來謝安世大憾以爲舉賢豈能豈有私謝絕弗與通李光弼固郭子儀所薦也然二將實不相能何嘗以薦引加厚他如婁師德之薦狄仁

傑王旦之薦寇準狄與寇二人初不之知此皆唐宋以來
 賢將相也後世一為舉主則師生名誼不惟終其身且延
 其世何怪楊復恭罵唐昭宗為負心門生天子乎夫師者
 必其人文章德行道義可為師法故以師事之非師其名
 位也唐以禮部試士士之得舉者皆稱門生猶未以師禮
 事主試之人主試者亦不盡以弟子待所舉之士也若因
 感遇知己不忘舊恩則存乎其人而已及乎宋世乃有以
 主試所得士必當私報否則以為荒莊者相習至今雖深
 明古義者亦不能免俗甚乃師生誼重君臣之義轉輕宵
 忤天子而不敢忤大臣甯負朝廷而不敢負私室以為國
 求賢之大典竟為植黨營私之善計私門之害國家甚於
 朋黨是可深歎也矣然則師生之誼將遂廢乎曰曷為其

可廢也誼主於愛君子之愛人也以德知己之感誼何可
 忘惟舉主以公忠報國進德修業望其門生門生亦以公
 忠報國不隕名德望其舉主則相得益彰師生之名實乃
 稱耳夫舉主以得人報其君門生即以報國家者報舉主
 誼孰有大於此者哉若世俗報施之事患難相急之情則
 一飯猶不可忘知遇之感不待言矣私不廢公乃可謂之
 君子焉爾公義私恩辨之不可不晰也
右師生名誼
 當辨公私
 人在貧賤患難之中忽有人周其困乏出之泥塗烏能無
 知遇之感然苟不擇而受之是妄以身許人也儻彼有所
 深求安知異日不大受其累乎蔡伯皆曠世逸才猶失身
 於董卓荀文若失身曹操既悔之而死此嗜賢者而不能
 免無怪後世比附大姦身敗名裂者不絕於史書也孟子

曰志士不忘在溝壑諺曰丈夫不受人憐可不三復斯言乎

右私恩不可妄受

郭汾陽以元宗天寶十四載乙未始爲朔方節度使是時安祿山已反歷事肅宗代宗德宗卒於建中二年辛酉前後二十七年常以藩鎮將兵於外以時入朝而已雖加尙書令而未嘗受益所事皆中主李輔國魚朝恩用事於內元載依附之以固其位汾陽若爲相在朝力未能誅必且不安其身其時外患不已故嘗將兵於外以重朝廷而鎮撫四夷中外倚之然後社稷以安身名俱泰大智大勇洵非他人所能及也若夫身引重兵入清君側此權臣所爲豈忠純若汾陽者肯出此乎雖然唐之郭汾陽宋之岳忠武皆純忠也幸乃爲汾陽不幸乃爲忠武若高宗者其又

唐肅代德三宗之不若哉

右郭汾陽不肯屈朝

往讀佛經中多梵語不可曉唐僧元應一切經音義多所解釋又有佛爾雅一書嘗見之矣衛藏圖識載蠻語一卷頗近梵語有可通釋者今採之爲蕃爾雅十九篇以資考證備方言 釋天曰浪天也尼嘛日也大瓦一曰達哇月也噶兒嘛藏曰宿米星也眞藏曰風包雲也托藏曰音獨雷也律電也八木藏曰咋霜也咋哇雪也木罷霧也攷爾罷露也岔耳罷雨也謝耳哇雹也弄風也毒哇烟也尼嘛貢日出也尼嘛浪所日落也達哇貢兒月出也達哇浪索月落也八哇桑金星也卜耳不木星也訥巴水星也迷墨兒火星也水巴士星也拔息拔霜降也弄浪風起也弄拉風住也半浪虛空也擢音法界也浪當天晴也浪簇天陰

也真禿雲厚也真索雲薄也岔約有雨也岔滅無雨也弄
達耳風幔也納巴拉風寒也尼嘛波日照也尼嘛交日遮
也 釋地曰薩地也只頂世界也甲息皇圖也甲亢天下
也奇密中國也薩利地方也出一曰楮水也迷火也奪石也
拉一曰喇山也杰嘛沙也江錯海也出稱江也出窩河也
出迷泉也稱罷井也姜牆也喇瓦園也朗道也散罷一曰
三壩橋也零長也同知也地零遠也同他近也丁饒深也沒
饒淺也托高也慢低也羊寬也奪窄也甲扯廣也竹目四
方也約動也膩軟也撒硬也瀑流也拉撒佛地也柔結旦
巴佛教也罵出黃河也出戎好水也出恩惡水也毒耳塵
也松奪街也龍巴溝也塔邊也 釋時曰吉卡春也約卡
夏也段卡秋也棍卡冬也洛年也達月也尼日也菊時也

尼參晝夜也擦熱也章寒也卓煖也昔涼也恰凍也擦章
仰温也菊錯時節也澤零夜長也澤同夜短也 達零今日
也送逆明日也達洛今年也送迫明年也裁馬昔也達達
今時也于苓永遠也尼麼晝也澤麼夜也阿卓早也赤卓
藏曰尼嘛拉蓋晚也朗拉半夜也洛鯉新年也洛逆舊年
也 釋名曰安奔大人也甲本漢官也鸞播宰相也甲薛
王子也密本土官也育本地方官也牒巴頭目也破本文
官也嘛本武官也洛本師傅也索嘛徒弟也更登僧人也
滾巴藏曰朱巴道士也馬米藏曰甲米兵也葱巴百姓也
刺麻有道僧也約因奴婢也洛孺聰明也業瓦親也羊滅
曾祖也滅播祖也拔父也媽母也庫窩扯哇伯也庫窩叔
也阿戎舅也不子也卜磨女也撲窩藏曰冰冰兄也洛商

藏曰角角弟也造窩姪也羊擦孫也結巴男子也雞滅一
 曰阿甲婦人也欽巴妻也出波富也物波貧也角巴緊也
 達波主也拏梭歲也格波老也甲巴一曰夾壩賊也札巴
 和尚也覺麼藏曰阿妮子尼姑也拔牙繼父也媽牙繼母
 也樸奴兄弟也雜窩朋友也江波伶俐也其澤懶惰也
 釋體曰慮身也俄頭也吉窩頂也匪髮也密一曰雪密眼
 也密布眉也納瓦耳也納鼻也噶口也出唇也索齒也吳
 麻乳也喇巴手也辦巴肚也桑巴心也工巴腳也物氣也
 孰瓦一曰獨又曰筋支瘡也結舌也衣尼模樣也菊筋也
 涉摩力氣也裁面也望盪福氣也端念也性尼心性也額
 想也章胸也梭磨指也稱巴肝也落牙肺也入巴骨也布
 毛也剎血也望輒強也念蟲哇弱也 釋宮曰撥章宮殿

也亢罷一曰空罷房也喇亢寺院也商一曰作庫也中譯
 亢書房也本亢衙門也破梁也葛元瓦也棟馬椽也郭門
 也格亢窗也宗寨也車鄧塔也馬噶營盤也 釋器曰湯
 噶一曰替印也卓哇大碗也冲哇底小盃也裸麻碟也冲
 筒酒盞也薄銃一曰克斗也戎罷一曰札波盆也打札響
 也絨一曰拉阿鍋也角一曰小杓也郭甲鎖也的鑰匙也
 申答車也直刀也熱直劍也東牙也樸牌也茹弓也達箭
 也明達鎗也達兒旗也超甲也磨盔也佳船也阿鼓也剎
 喇鉢也棄折鈴杵也箔破香爐也絆旛也卡阿鑼也搭巴
 繩也稍斗傘也哈一曰打甲鞍也令卜箇也渣居鏡也冬
 螺也丁赤座也麻滅一曰雪滅鏡也格梯也 釋食曰薩
 凍飲食也薩喫也薩嘛喫飯也直一曰土巴麪也折米也

昌一曰噶又曰冲酒也札一曰甲大茶也糝粑炒麩也脈
 兒酥油也章致密也沙肉也甲昌黃酒也脈約清酒也擦
 鹽也艾一曰撥浪甜也渴苦也卓洗麥也 釋服曰拿薩
 官服也郭一曰楮巴民衣也熱帽也物熱官帽也康一曰
 夯靴也播又曰習禡也蕃無鞮與漢語同葛巾緞子也達
 綾也索麻納雜麻繩也杆一曰浪布氈氈也孤巴一曰葛
 巾線也輟郭法衣也 釋色曰該布一曰葛葛白也烘布
 一曰拉拉藍也謝布一曰温布黃也脈布紅也黑納紫也
 卡奪五采也江納油綠也 釋佛曰詔如來也曠絨節然
 燈也沙加兔巴釋迦也吶神也折鬼也刺上也麻無也刺
 麻無上之稱也葛菊一曰益蓋藏經也當罷目錄也班播
 卷也列吾品也刺谷佛像也工卻桑三寶也勒頂一曰勒

角羅漢也丹轍妙法也 釋文曰別岔書也哆經也杓谷
 紙也納咱墨也奴谷筆也體物圖書也薩遺真字也播遺
 蕃字也幔遺醫書也且菊語錄也 釋方曰廈耳東也奴
 西也洛南也降北也頂上也臥下也怨左也葉右也頓前
 也交後也囊內也且外也拔耳中也囊且內外也 釋卉
 曰密朶花也甲一曰極木也申卜一曰酉樹也納林也咱
 草也奴麻竹也百麻蓮花也咱瓦根也腋枝也羅麻葉也
 甚奪果品也萃茜也阿立看布杏也看布桃也 釋禽曰
 答虎也席豹也新革獅子也出心麒麟也供彪也奪熊也
 瓦狐也沙瓦鹿也章谷狼也蛙哇鼠也郭鷹也安畝駝也
 作一曰克嘛牛也耳工一曰日工兔也律龍也直蛇也達
 馬也路羊也折一曰畢武猴也氣狗也怕一曰拔猪也麼

亥水羊也坡達騮馬也郭嘛騾馬也速迷貓也窮窮鳳凰也卯甲孔雀也甲雞也昂巴鷺也念一曰阿魚也樸耳飛也啞鳴也廈宿也尋食也 釋貨曰木的珍珠也席瑪瑙也菊六珊瑚也不奢琥珀也含耳玉也謝兒一曰塞金也硬一曰藕銀也納一曰拉銅也然宜錫也渣鐵也出奢水晶也硬出水銀也章卡銀錢也拔梭象牙也 釋藥曰蒟藏香也贊丹檀香阿葛盧沉香也甚艾甘草也噶布魯冰片也雜的豆蔻也看壓杏仁也素罷白芨也勝棍阿魏也擦郭硃砂也黎赤黃丹也吉望牛黃也 釋數曰吉一也逆二也桑三也曰四也阿五也竹六也頃七也傑八也固九也菊十也甲百也凍千也赤萬也忙多也濃少也甲杠一曰甲嘛一斤也松杠一曰張杠一兩也若杠一錢也喀

嗎杠一分也釐杠一釐也 釋人曰額我也卻爾也空他也扛誰也朗自也葛兒舞也六朝唱也噶喜也長情一曰义不叩頭也棕笑也樸瓦樂也送去也弱來也准請也列刻也拔挫世職也栽尋也浪起也曳借也舍知也悅在也念肯也入哇回也丁真也尊假也赤遲也角快也早奪商量也胖可惜也通見也麻通一曰門通不見也篤得太平也烏拉背夫也又馱畜也端聶兒公幹也查赤一曰約吉跟隨也董打也俄達投誠也丹連管待也官腳保佑也謝膽也占同也倉瓦全也喇賞也輒罷罰也鯁新也甯舊也元登才情也俄洛反叛也亨藏團圓也 右蕃爾雅

曲濟嘉木參初八日始過江卡計至乍雅給假五日後乃赴察木多余同丁別駕畱江卡兩日以待之十三日啓行

五千里至山根于茶憩登山圖識所云終年積雪盛夏亦涼颼刺骨者余過時節近夏至山凹中積雪數處行人履之猶堅凍也氣候亦寒較江卡以東大異復覺微喘恍如折多道上水土之惡可知矣上下七十里至黎樹途中雪雹急雨數陣倏晴倏陰止後復雨雪雹半刻通志云黎樹不可語語則有雹豈信然耶此地蠻民二十三戶有塘兵十數人台吉遣頭人於此供應烏拉柴草十四日黎樹啓行沿山坡五十里至阿拉塘地屬阿布拉蕃人謂山爲拉故以山得名地亦平廣蕃數十戶有刺麻寺熱傲在此備換烏拉輿中食雞子三枚復過一山遇雹再過一山遇雨旋霽申刻至石板溝止焉

右黎樹

途中偶憶南北朝代父從軍之木蘭前人知爲北魏人矣

然究屬北魏何時何代之人其從軍爲何時何地之事尙未考也以余考之木蘭蓋古武威今涼州人也其從軍事在孝文帝太和二十年後宣武帝景明正始年間何以見之卽於木蘭辭中得之也自古羌胡衣服與中國異何況女子今其辭云脫我戰時袍著我舊時裳以羌胡女子而爲裳衣顯然變服從中國又云歸來見天子天子坐明堂按孝文帝太和十六年始作明堂行養老之禮十八年始禁胡服以此二事證之故知木蘭爲孝文作明堂禁胡服以後人也曷言乎武威人也其辭云朝辭耶孃去暮宿黃河邊不聞耶孃喚女聲惟聞黃河流水鳴濺濺且辭黃河去暮宿黑水頭不聞耶孃喚女聲惟聞燕山胡騎嗚啾啾詳此詩意是木蘭之家去黃河僅一日而所宿之黃河邊

去黑水亦僅一日黑水距其家不過二日其武威而何黃河之水自積石而來至入長城處已歷千里且受大夏諸河之水其流盛大不得作濺濺淺水之鳴且其家一日至黃河黃河在南北去黑水八百餘里安得旦辭黃河暮宿黑水乎蓋辭本云黃河邊邊者近之謂耳黃河東過大夏有大通河自西北經祁連山過武威而來會此水北距黑水之源不及二百里辭云黑水頭頭即源也祁連山在大通黑水二河之間即所云燕山也祁連燕支二山本一爲胡人要地漢時匈奴失此二山爲之歌曰失我祁連山使我六畜不蕃息失我燕支山使我婦女無顏色其爲屯兵重地可知故木蘭宿黑水而聞燕山胡騎之鳴也然則所云黃河邊者即今之大通河以其南入黃河爲一水故被

以黃河之名矣木蘭所宿之黑水頭去其家僅二日豈非武威人之確證乎曷言其從軍在太和正始閒也武威在燕山東南觀其去家至西北從軍則非有事齊梁矣孝文帝太和十六年敗柔然於大磧二十二年討破高車明年帝殂宣武帝即位改元景明凡四年而改元正始元年築九城於北邊此十數年中皆有事西北築城後乃定高車柔然正在燕山之西北木蘭從軍十年乃歸且有將軍百戰死之語度其從軍之久情事多與史合故知爲太和正始年間屢次用兵西域時事也

漢時酒泉武威張掖三郡皆涼地羌人所居酒泉今之肅州張掖今之甘州武威爲西涼今之涼州是也北魏明元帝泰常五年西涼王李歆爲北涼沮渠蒙遜所滅太武帝

太延五年滅北涼明年沮渠無諱寇酒泉太平眞君二年
克酒泉無諱西渡流沙入據鄯善又據高昌李寶自伊吾
入據燉煌封寶爲燉煌公四年自將擊柔然五年無諱卒
李寶入朝留之六年伐鄯善鄯善降西域復通八年平西
域十年自伐柔然可汗遁文成帝太安二年克伊吾四年
自伐柔然刻石紀功而還和平元年伐吐谷渾獻文帝皇
興四年擊敗吐谷渾自將擊柔然孝文帝延興二年柔然
入寇擊走之三年吐谷渾入寇擊降之四年柔然寇燉煌
蓋北魏之世西北塞外歲常用兵未有如木蘭從軍之久
者以非大將故史畧之非無名氏一辭則奇女子竟湮沒
矣孰謂文章不足多乎

右木蘭生地時事考

以無求於中國故五涼相繼與五胡角立中州人士避難
者多往依之楊升庵謂其風土可樂如此引唐韋蟾詩賀
蘭山下果園城塞北江南舊有名稱其爲塞北江南以此
余按今甘肅省治蘭州府縣名皋蘭皆以賀蘭山得名也
塞北江南殆指此地至今繁盛通典所論乃古之涼州非
今之涼州也今之涼州在蘭州府西北六百餘里古之武
威郡也晉時張軌據河西爲前涼楊云今之甘州呂光繼
之爲後涼李暠遷酒泉楊云今之肅州又遷沙州號西涼
楊云今在肅州西八百里沮渠蒙遜據張掖號北涼楊云
今鎮番衛禿髮烏孤據姑臧號南涼楊云今之西甯也此
之謂五涼通典蓋通論五涼之地云爾

右五涼

十五日過河沿溝迎日東行入山復東北行過大山二坡

路頗平時見積雪卽圖識所謂大雪山矣五十五里至阿足皆東北行圖識云西南行誤也將至阿足大呼圖克圖之兄覺拉率頭人來迎詢大呼圖克圖云十三日至乍雅矣阿足乃乍雅首站山勢尙不甚險惡耕種之地數十頃蕃民數十戶塘兵十數人外委一員領之余與丁則駕宿關帝廟內覺拉及頭人入見稱大呼圖命呈送土物御之令先回乍雅諭大呼圖五日假滿卽赴察木多不可遲延覺拉言其弟出外數年今日始歸眾頭人百姓懇留一月未敢允許伊以手足之情乞准假十五日余許爲伊展一日爲眾頭人展一日致謝而去

右阿足

康輜紀行卷之六

桐城姚瑩展和甫

或問天穹窿在上其於人事無不察者果以日月照臨乎抑以鬼神鑒察乎曰是矣而不止此也天無形質以氣爲體氣無不在人在氣中不見氣猶魚在水中不見水鬼在土中不見土也六氣不時人感之而疾病此氣之動者耳不動之氣無時不有無物不在也何以見之於扇之生風見之室本無風扇動而風生豈扇有氣哉以扇搖動激其氣而成風耳有竅亦皆生風故當門者有風窺穴者有風蓋不動之氣渟滯空際觸物必動透竅必出也知氣無不出則知天無不在矣天以氣爲體如人以血肉爲身人在氣中如蟻蝨在人身隨動卽覺豈有告之者乎故人一舉

動天即知之不待日月之照臨鬼神之鑒察也雖然天德含宏廣大苟創事物而禍福之則天不勝其勞亦不若是之苛也故陽授其權於日月陰授其權於鬼神日月鬼神者天之一氣凝聚之至精者也日月可見鬼神不可見可見者為陽司陽之權為天子日月不明則天子失其治矣司陰之權為鬼神鬼神之知能亞於日月能自禍福人而輔相天子為治者也人事萬殊天子有知有不知鬼神則無不知故天子之禍福有所及有所不及鬼神則無所不及鬼神之無所不及也一天之無所不及而已矣壬充論衡曰天氣也故其去人不遠人有是非陰為德善天輒知之而輒應之右天人一氣感應之理

尹翁歸之扶風過辭廷尉于定國于欲託其邑子語終日竟不敢見何並之類川過辭廷尉鍾元元弟威為郡掾而

賊元為免冠請一等之罪並不許竟殺之論者皆美于而薄鍾余曰鍾未可薄也邑子本疏其託也可止威與元兄弟也為親故求免一死其過也可原元之請並之殺一盡其仁一行其義而已矣

右于鍾二廷尉請託

連日晴雨不時寒暄數易體中微有所感棉衣三重加狐皮馬褂尚覺惡寒惟食粥以清其胃通事與人亦多病者曲濟嘉木參復請展假停止一日為亡友張亨甫作傳午刻雨申刻始止河水大漲

右張亨甫傳

十七日自阿足東北行二十里過阿足河水稍退勢猶洶湧肩輿難涉策馬以濟二十里過歌二塘川原平闊停輿候換烏拉十里上山至洛加宗依山蠻戶二三十家為一處數處相望對山一處則吳公寨兩呼圖相爭時白瑪奚

所攻卽此余與丁別駕共棲土屋一閒壁上土簌簌落余有覆墻之恐遠墻爲行牀焉乍雅守備遣卒十人來迎謝遣令去亥刻聞蠻房有傾覆者斃七人傷二人卽乍雅來卒所舍也卒去而差竣未反之蕃人宿焉遂遭其禍豈非數耶召其頭人厚卹之是夜亥時夏至

右洛加宗

阿足所過河圖識謂之阿足河土名也按今輿圖當爲勒楚河卽瀾滄江東北一支之上流也瀾滄江來源幹流有二東北一幹最遠其源出玉樹土司之南中格爾吉土司境內之格爾吉河東南流至巴顏囊謙土司境內名匝楚河又東南流過察木多之南二百六十餘里勒索河自乍雅東南合色爾恭河楚楚河及乍雅西北之猛楚河來會西南流至阿足過江卡入西北一大幹流始名瀾滄江

右阿足河卽勒楚河

十八日沿河北行山坡雖平而迂曲四十里過大木橋卽俄倫多山頗險仄多偏橋三十里至乍雅駐防守備一員把總一員兵三十餘名詢曲濟嘉木參已於本日啓行矣胥守備言宣太守初二日至察木多遣通事齋諭傳丹臻江錯至王卡不能進別令土蕃齎往取夷稟而回未知覆詞何若也乍雅地勢平闊四面皆山會典所云乍雅廟在北山之麓卽曲濟嘉木參言其二輩刺麻四朗隆珠所修不果寺又名噶德學朱青科爾寺也中宏可容千人廟之左偏稍後爲頭輩刺麻札巴江錯金塔亂後廟內多傾圮中有大銅佛像亦爲烏鎗破毀現存刺麻僅百餘人居廟外之左其前爲轉經閣通志所云男女婚媾俱於此歌唱

以定者也餘皆頭人蕃民所居約百餘戶山下爲守備署其右爲江巴廟內有石佛眾刺麻誦經禮拜之所廟門左右有碑廟之西爲關帝廟更西則行館也民居約數十戶兵蕃雜處勒楚河自山之東南流入會楚楚猛楚二河西南流入瀾滄江自江卡來者東北過楚楚河有大木橋卽至乍雅其東傍山溝行三十里爲紅布溝卽白瑪奚轄地楚楚河自此流出至乍雅大寺前與勒楚猛楚二水會故名楚楚河也北行登山稍西卽往察木多大路山南雪水下澗卽猛楚河南流合楚楚勒楚二河西去二呼圖所居寺院名卡撒頂又名麻貢土人名煙袋塘在乍雅之西馬行二日可至通志云乍雅在布政司西南三千一百零五里東至阿足一百七十里西至八貢三百四十里南界擦

哇岡北界官角乍雅土城周圍百餘丈余按乍雅今無土城惟麻貢有之曲濟嘉木參言札巴江錯始建廟在麻貢因其地在山窩形似帳房故名其地爲乍雅然則乍雅之地本卽麻貢初不甚著及四朗隆珠又建廟於今之乍雅至羅藏朗結在此廟中受封號遂相傳以此爲乍雅矣

右乍雅

四川通志云勒楮河在乍雅大寺前源出乍雅西北昂喇山下合甲倉楮河又有樂楮河源出乍雅西北作喇山合甲倉楮河甲倉楮河經流洛隆宗合樂楮河到乍雅界又有色楮河源出上納奪經流江卡西南流入察木多大河余按此云勒楮河者卽今輿圖之勒楚河也楮楚音同樂楮甲倉楮二河志說未詳通志又云昂喇山在乍雅西北

危峻八十里進藏要道冬春多積雪余按自江卡至乍雅皆東北行乍雅至察木多乃北行昂喇山爲乍雅至察木多所必經山南雪水皆東流至乍雅大寺前會紅布溝之楚楚河而西南流山北別一水經王卡來亦西南流會色楮河入察木多大河其在王卡之河頗寬過王卡必過此河有大木橋以濟行人昂喇山北有地名昂地卽以山得名也

又按通志所云色楮河源出上納奪經流江卡等處西南流入察木多大河者以今輿圖考之上納奪土司境內惟有布壘楚河上承木魯烏蘇河經上納奪東南流過巴塘入金沙江與察木多大河入瀾滄江者不通且亦不過江卡惟上納奪土司所屬四土司之西有一小水發源於此

西南流入而楚河卽察木多之大河南流經乍雅之西境會楚楚河色爾恭河勒楚河諸水南過江卡入瀾滄江是色楮河者卽此水耳色楮與匝楚音固相近也察木多在江卡之北上流數百里當云流經察木多大河南過江卡等處方合志言誤矣

又按今輿圖乍雅東南有水名色爾恭河發源東北西南入乍雅境合江卡東北境之勒楚河西北流入楚楚河卽通志之勒楮河也勒楮河源出乍雅東南在江卡之東北與乍雅西北之昂喇山無涉通志以爲源出昂喇其失遠矣

右乍雅諸河二條

二十日發宣太守書巴塘錢明府寄示邸抄知劉次白中丞引疾鄧嶰筠先生經理屯田事竣授陝撫二月十六日

事也

右邱鈔

理藩院請修呼圖克圖刺麻源流冊其奏略曰 國家
統一寰宇凡藏衛西甯之唐古忒呼圖克圖刺麻內外札
薩克各旗之蒙古呼圖克圖刺麻向化輸誠或以功績優
著或因經典深通歷賞職名冊敕印信其銜有呼圖克圖
那門汗班第達綽爾濟之次序其號有國師禪師之分冊
印或玉或銀或鍍金各視其職銜名號大小爲定其圓寂
轉世溯查遠年漫無規制遇有報出呼畢勒罕者但憑西
藏唐古忒刺麻吹忠辨認是非乾隆五十八年定制於
雍和宮暨西藏各設金瓶蒙古所出呼畢勒罕由 雍
和官籤名入掣唐古忒出呼畢勒罕由西藏大臣籤名入
掣達賴刺麻等俗家不得入掣凡駐札前後藏之唐古忒

刺麻達賴刺麻班禪額爾德尼西甯之唐古忒刺麻章嘉
呼圖克圖內外札薩克所屬之蒙古刺麻哲布尊丹巴呼
圖克圖等共一百四十七名彙爲一冊原有敕印可憑者
准其補入轉世冊檔無名者悉不准其轉世立法至美且
備惟後來奉行未善致雖有敕印而生前未及補入冊檔
者有之或轉世後前輩確有敕印而礙於冊檔無名不能
補入者有之又或憑其敕印奏准入冊而但於稿內聲明
又或冊檔空列人名並無事跡可稽至於其人名下圓寂
轉世地方年月僅載一輩其後垂今六十年未嘗修辦前
此臣院查出吉勒圖堪尼爾德蒙額那門汗暨有敕印以
遺漏入檔致圓寂後轉世將其敕印追銷不准轉世又四
川咨查乍雅呼圖克圖早經入瓶籤掣而實未入檔俱已

隨時更正雖覺範與政體難以相提併論要必準情酌理有所依據若不及蚤修輯遇事憑何信守臣等酌議揀例案較熟司官數員請旨派章嘉呼圖克圖會辦詳查原冊定出規條分別應裁應留應補就平日調到各處文冊核對仍飛行前後藏西甯內外札薩克另造全冊送院以免遺漏

右理藩院請修刺麻源流冊

本年正月甘肅奏獲青蓮教匪夏長青等湖北亦奏獲教匪陳依精等皆稱聽從四川人李一沅傳教四川旋獲李一沅及其黨鄭子青六十餘人李一沅稱在湖北與陳汝陽設壇請無生老母降乩令其傳徒錄有綾書經句十報十讖三皈五戒之文稱彌勒轉生朱家總教主朱中立在湖北又號八牛教分排次第一等曰內五行爲陳依精彭

依法林依祕葛依元等在湖北傳徒二等曰十地在川陝各省掌教李一沅掌四川陝甘爲一地三等曰一百零八盤分至各省傳徒右見邸抄及四川奏稿先是道光七年四川獲教首楊守一及其黨遣發新疆適有張格爾之亂諸遣犯從軍出力多赦歸至是復興其教幸早破獲然首惑人者朱中立也若得而誅之使天下知彌勒之邪說爲僞庶愚民知誤否則其徒眾多可勝誅耶蜀中囑匪幾於徧地其黨日眾雖時有誅懲防緝亦嚴而伏莽終爲可慮况益以教匪之眾若非比歲豐登能無惴惴乎嗟呼盜之爲患自古然矣苟爲上者誠心治盜必先清心寡欲而後可蓋心清則用人公明守令得人盜於何有

右獲青蓮教匪

民屯田大學士長公議新疆流民多隻身日久不免故絕
逃亡思欲皆成土著須廣招畝戶庶人戶日增田土日闢
當時奏准惟喀什噶爾及巴楚喀喇兩處與屯爲數無多近
時議者多及邊外屯田事道光二十四年喀拉沙爾辦事
大臣全慶奏原設屯工種地僅止六千餘畝今改招有眷
民戶開墾三屯山地共十萬四千畝定界址開大渠每戶
承種以二百畝爲率每畝六升五合升科年可徵糧六千
七百六十石餘支本處官兵口糧各官加增養廉鹽菜外
尙有盈餘存倉其三屯每工設戶長一人具狀保結按畝
升科道光二十四年秋後交納如有欠糧惟戶長是問仍
令章京均勻分撥渠水各資灌溉喀拉沙爾爲回疆門戶
回眾與蒙古諸部落分錯其閒地勢雄險惟附近城地當

衝遼闊而少人煙今招徠耕民六百三十五戶所種地近
往來大路堪爲城郭藩籬平時賴以耕耘有事資其捍衛
此後民戶日多氣勢聯絡可以扼南路之衝要壯回疆各
城之聲威以上見邸抄全公奏稿摘錄於此全公滿洲正
白旗人道光己丑進士

右喀拉沙爾屯田

二十二日復夜兩達旦胥守備言乍雅夷情刁悍地不生
樹木營兵苦乏柴薪惟蕃人自紅布溝以牛糞來市買作
薪馬食山草皆給價而後可近有馬偶多食之蕃人遂斷
水草二十餘日其不馴如此塘汛之設不過走遞公文不
能彈壓也

右乍雅夷情刁悍

江巴廟前有二碑一爲兵蕃捐修本廟緣起一則乾隆十
八年癸酉七月乍雅克察頂江卡昂地駐防眾官兵爲呼

圖克圖平減糧價之頌德碑也其文鄙陋不通敘列漢蕃
官銜名稱管理克察頂一帶地方二呼圖克圖羅藏丹巴
八管理乍雅一帶地方三呼圖克圖羅藏林欽則是二呼
圖克圖分管地方由來久矣不惟有二呼圖且有三呼圖
也卡察頂即通志之卡撒頂三呼圖不知廢自何時

右江巴
廟碑

儒者言理術家言數釋氏言因凡事求其理而不得則參
之數更推其數而不得則付之因三者若不同而實不相
倍益理主其常反是則變天下不能有常無變也以數推
之則可即常觀變矣數之變有萬而各有所起起即因也
以所因究之則可即起知止矣常變起止可推可究非理
乎一理明則數與因在其中矣事勢所必者理也數有千

萬而各處其一隨舉其一皆可為起所起者異即所止之
數千萬亦異尋其一而推之十百千萬可知非理乎數有
盡而理不與同盡因有起而理即與之為起故有一而後
有萬一即萬之因也因有外來有自中起聖人不自起因
坐以觀變故常主於靜

右理數因

州牧最尊貴始自唐虞諸侯伯之長也後漢時州牧統諸
郡邑六朝稱刺史亦在郡守之上其權甚重如今督撫宋
時改郡為州分四等有節度防禦團練刺史之別刺史為
下等州然皆有屬邑實郡守也今之直隸州蓋宋刺史州
矣世人書文詩歌中每文其稱曰刺史雖僭而非古猶自
有說若今府屬諸州秩雖五品實乃令宰耳不可稱刺史
矣今一以刺史稱之非也至如院司公牘中毋論直隸屬

州同日某牧混而無據不更僭之甚乎

右州牧

二十三日晴覺拉告烏拉已齊沿山西北行遙望雪山凌霄插漢口占一絕云紫菊花開事遠游黃梅子熟尚悠悠蠻山亦自含愁重笏立千峯盡白頭三十里過雨撒蕃民數戶甚寥落又三十餘里上大雪山積雪甚厚一望無際滑險異常人馬數蹶通志云昂喇山上下約八十里進藏要道冬春積雪行者苦之是矣作雪山行曰夏至已過生一陰雪山雪甚愁人心崔巍高下渾莫辨神搖目眩誰則禁馬蹶數蹶骨欲折十人九仆還呻吟千年老鵬不敢過狐兔放膽時追尋日方卓午正騰耀雪光不受相欺侵白雪雖白黯無色惟見缺處杳青天青我聞丹達之山多雪窟井嘗數丈無其深昔人運餉此一墮數年雪化軀亭

亭官卑未卹名亦沒神廟赫奕猶垂今感念貞魂一灑淚崎嶇世路徒惺惺吁嗟乎勞人草草古所嘆我歌一闋君其聽三十餘里下山至昂地雪盡水流漫溢行者苦之曲濟嘉木參畱頭人於此供應烏拉其倉儲巴谷喜隨至察木多矣

右雪山行

二十四日順山溝西行三十里至噶噶爲倉儲巴彭錯轄地丹臻江錯及彭錯彭錯達吉各遺業爾倉巴來候呈送主物卻之過噶噶西上大雪山亂石崎嶇上下數十里極險峻積雪方化水流漫溢既下沿溝曲折崎嶇益甚自噶噶西北六十里至王卡河西南流怒濤洶湧頗深廣意卽察木多南來之匝楚河也王卡南北迂回十數里沿山窺樓蠻寨約數百戶山下沃壤長河極爲富庶倉儲巴谷喜

之轄地也曲濟嘉木參產此昨過王卡畱四日乃行使谷
喜來以其情告谷喜云大呼圖甫行烏拉須返而供役牛
馬疲乏求休息兩日許之令傳諭曲濟嘉木參至巴貢勿
復畱滯也谷喜去巴貢頭人冷中吉來聞不許大呼圖之
畱苦懇許以一口

右昂地噶噶王卡

二十五日蚤起與丁別駕論近時將帥之廉勇無如陳提
督化成者爲作小傳別駕手錄其稿

右陳提督小傳

未至王卡二十餘里水石縱橫人馬行巉巖峭壁下架偏
橋以濟極險隘名老龍溝地多邪崇過者苦觸染蕃僧以
二長繩貫溝兩岸小方布書符咒凡數十道懸以鎮之過
溝里許蕃民數十戶有佛樓小院頗修整一刻麻於石壁
上砌小屋方僅丈於中習靜無梯亦無門惟一小竇十日

一次人以竿懸飲食進之老死乃剛而火之自此至藏云
多有之聞藏內尤眾有跌坐巖樹下經數年者月或一食

右老龍溝

二十六日曲濟嘉木參遣告巴貢西卽察木多界得察木
多書云此行烏拉需五六百不能速集囑其緩進以書來
請示許停三日余與丁別駕改以二十九日自王卡啓行
書致宣太守告以緩故及傳諭丹臻江錯之事

右王卡守

嚮聞入藏之道自石板溝分路由左貢行十一站可至瓦
合寨不由乍雅察木多一路卽道光二十一年達賴刺麻
入貢之路也自石板溝至瓦合寨大道由乍雅察木多行
凡十四站左貢一路可少三站路甚平坦亦不過溜筒之

險頃從常行此路者訪之乃得其詳蓋自石板溝分道九
 十里過大山至鍾玉喜有寨落可換夫馬六十里過山至札喜打
 桑乃橋名有寨落七十里至薩玉喜無寨落有蠻帳房可住可換夫馬八十里至
 左貢於此河換夫馬自石板溝至薩玉喜四站江卡台吉
 所轄也左貢六十里至天通有寨落換夫馬七十里至納隆喜無帳房
 房寨七十里至奔達有寨落換夫馬九十里至曲札有寨落換夫馬自左
 貢至奔達四站左貢蕃營官所轄也夫馬柴草皆其供應
 曲札六十里至角達有帳房六十里至葛金有帳房換夫馬一百二
 十里至瓦合寨復歸大道自曲札至葛金三站八宿蕃官
 所轄也夫馬柴草皆其供應以上十一站皆達賴刺麻之
 地惟札喜打桑鍾玉喜以東有二大山餘皆坦道
 藏至瓦合取道左貢十一站至江卡復有一路並記於此

曰自瓦合東南行濟仲刺麻所轄黑帳房地一站曰噶井
 有熱傲二站曰曲札有熱傲三站曰那達有大刺麻寺及
 蠻寨大熱傲四站曰田都有頭八蠻寨小刺麻寺五站曰
 左貢有大營官蠻寨六站曰烏鴉有蠻寨七站曰東達過
 山有蠻寨八站曰噶行有小公館次日過小山地名占更
 換烏拉九站曰角有蠻寨宿此明日過溜筒河十站曰拉
 窩過小山即江卡矣此一路乃達賴刺麻每年赴藏買茶
 大道也通計不及十一站左貢以上與前一道同暢井即
 葛金一百二十里至曲札道平一日可至那達即奔達也
 田都即天通曲札至此一百四十里晝長一日可至左貢
 以下乃分道六站而至江卡此一路近十餘歲運餉委員
 由藏返省皆取道於此以避察木多乍雅之頑悍惟溜筒

稍險人馬懸渡

欽使不便耳十月後河冰凍合則人

輿可通亦可以小舟渡矣

右左貢入藏道里

蕃性犬狼也兩呼圖克圖各用其私人構兵不已屢令文武勸諭之不息判斷之不遵冷中碩輩敢阻困回京之大臣肆其挾制此而不振以兵威其有濟乎夫蠻觸相爭本可置之不問其所以不能置之者徒以川藏孔道臺站所在不可梗阻耳然川藏自有孔道非舍此不通何必沾沾此路哉乍雅一路蕃情刁狡難馴自昔已然乾隆中卽有噶八站之稱見於衛藏圖識岳大將軍進兵西藏未由此路至今蕃人不識兵威每年委員解運藏餉臺站更替名爲承應烏拉實食其利於雇價外更邀賞茶布煙物復有酒錢背手種種無厭每過一站刁索阻延無不苦之皆視

爲畏途久矣故文武委員差竣回省多自察木多別雇騾馬由他道至江卡或阿拉塘復歸大道以避乍雅卽民間貨物往來亦不由此路其惡可知矣今若別爲備道則往來官民旣便刁狡之蕃無所挾持卽有蠻觸之爭而道路無虞梗塞彼此控愬或理或否我得操縱自如何致顧忌多端使車僕僕失體損威刁風日熾哉或曰徭役人情所不願也添設臺站其如他道之人不願何曰不然余所言備道者非他固達賴刺麻地也自江卡以西瓦合寨以東別有商賈往來之路旣通商賈豈不可設臺站乎達賴刺麻一蕃僧耳受 國家養育之恩予以全藏地優崇之者至矣其土地人民何一非 天朝所有供此徭役理復何辭且此每年之役皆藏餉賞需初非他人之用卽臺

站之設亦皆為藏地聯絡聲勢 國家既予以全藏之

地復設大臣重兵為之護衛以鎮撫人民捍禦外侮更不

惜歲費數萬 帑金越數千里委員饋運成都以西內

而州縣外則土司為藏地勞費多矣區區數百里之役以

藏人供藏用尚何言哉道光二十一年乍雅兩呼圖克圖

之眾相率達賴刺麻貢使即由彼所轄地行矣近年委員

如朱錫保武來兩劉光第寶鏡徐慶昌皆自他道回省即

商賈往來大道非不毛之地也稍一轉移便利實多若因

循仍舊其害無已惟明者察之而已

右設備道議

二十九日王卡啓程沿河北行十數里至熱水塘過河為

二呼圖克圖界又北行十餘里至三道橋復為大呼圖克

圖界頭人冷中積在此迎候又北行二十餘里至巴貢地

不甚寬石山南北對峙察木多大河自此流入形勢險阻

如石闕然

右巴貢

三十日自巴貢西北行登大山即巴貢山也河北石山接

連四十里石峯巉削高下林立色赭如火焰故土名火焰

山過山略下蟬聯相接為苦弄山乃乍雅察木多交界處

也蕃人語風曰弄山高大而多風行人苦之故名苦弄又

山多石穴望之如窟俗遂訛為窟窿山矣此山又四十餘

里乃至包墩陟降崎嶇較巴貢山尤為陡峻誠如圖識所

云終日蹀躞於荒山者也惟云多偏橋未見蓋數十年來

情形改變矣按苦弄山又名窟窿山見衛藏圖識而四川

乍雅巴貢界或即此山然云不甚險峻上下約二十五里似又不同

星之有文昌也古矣神之有文昌也始於近代經生家多

康輶紀行 卷之六
著論謂文昌六星本司祿命非世所傳之梓潼神也徵引古書其說甚辨余謂考古之學自不可少而天人之理實不可誣人本二氣五行所生其始未有非二五之精者也精則明明則神之與星一物耳星之精氣可降生而爲人人之精氣何不可上升而還爲星乎傳說殷相也歿爲箕尾之星梓潼神歿升爲文昌之星亦猶是耳化書所云雖若怪誕然人物死精氣不散感而復生實陰陽變化之理不可以三生之說出於釋氏而誕之也精氣本體無人物之可名其感而生也可以人亦可以物世儒惟知貴人賤物獨不思人有貴賤當辨其賢愚不可概以爲貴猶之物有貴賤當別其靈蠢不可概以爲賤也桀紂操莽有何可貴麟鳳龜龍豈可言賤人爲桀紂操莽之行則卽豺狼

蛇虎之心也人其形而豺狼蛇虎其心戾氣所聚雖死不散感而復生各以其類烏能不爲豺狼蛇虎乎此不必有地獄之神罰之極之也自爲之也物有麟鳳龜龍之德則卽聖賢豪傑之心也物其形而聖賢豪傑其心秀氣所鍾死亦不散感而復生亦從其類何必不爲聖賢豪傑乎此亦不必有天曹之神賞之命之也自爲之也然而實有神焉賞罰之而極之命之何也天地無心而有主宰天地之神聖人無心而有主宰人物之君人物之賢愚靈蠢能自爲之而世運之治亂隆污人運之盛衰修短不能自爲之必有司其權者而後整齊畫一人物以之而定否則散而無統大亂之道也故人所能自致者身心之善惡耳所不能自主者名位之貴賤氣數之修短也人貴其德本有可

貴其位之理 人善其心本有可修其數之理而不必盡然
 則司其權者別有道焉非人所能知而亦不必知之矣文
 昌之星司人祿命天星也可以人神為之人惟自修其德
 安知異日不可為神不可為星哉不強其志不究其理徒
 執書傳一言妄為辨難此亦泥古之過也六月初一日駐
 包墩丁別駕言梓潼縣文昌神廟事記此
右文昌星
 可以人神
 之為

天下事物莫不有所由來由來者事物之本原本原即道
 也事物可見本原則或見或不見智者明其理愚人泥其
 跡愚者多智者少道之所以不明也六經自秦火後賴漢
 儒傳之經傳即聖人之道以傳漢之大儒伏生歐陽申公
 董仲舒大小夏侯后蒼二戴孔安國劉子政鄭康成賈逵

服虔粗明聖道顧所講說訓詁詳於名物度數而簡於道
 理者道德性命之精微即寓於名物度數之中上智者可
 即此而見且名物度數之事古人童而習焉目見而身用
 之其學之也易後世三代法物皆不可見惟於方策是求
 其學之也難窮年畢世即粗者猶不能盡曉况其精微者
 乎有所及則有所不及非謂道德性命可不必事事也此
 數大儒者其於性命何若吾不能知固皆身蘊道德矣迨
 孔光張禹劉歆馬融輩但以傳經為業不以道德為重乃
 至身附篡逆猶自詡通儒是大叛乎聖人而為王者所必
 誅矣由不知道德性命為所當事也及乎宋世諸大儒出
 深有以明道之本原知聖人著述六經之旨固欲以治人
 善世非如有司之徒存其器典守其法也名物度數漢儒

既已詳明學者可以考索而得惟道德性命之精微漢儒有所未及故以其身所究明者闡發以示後人自是六經之旨乃明聖人之道乃備矣學者由漢儒所傳有以觀聖人之跡復由宋儒之說有以得聖人之心是兩代大儒皆吾父師也近世諸人因宋元明以來習漢儒之學者少從事於此妄自夸詡遂欲蔑棄宋儒矢口詆毀又以宋儒之學皆修身齊家正心誠意之事不敢昌言攻之也思宋儒所專精用力者無如四子書三尺童子無不習之則曰大學中庸本出戴記當還其舊若謂此不過數十篇中之二篇耳欲行其炫博矜奇之說則以聖賢切實精微之旨雜置繁文度數中使人厭棄之然後得自顯其長是其用心全爲自矜自炫之私初何嘗爲聖人之六經及世道人心

起見乎由其陷溺已深見宋儒之說有大不便於已故爲邪說以排距之然民有秉彝好是懿德天下何能受其欺乎

古事物本原於道

初二日夜雨達曉未已包墩沿河西北行過小山二大山一偏橋險峻崎嶇難行復值雨滴人馬苦困六十里乃至猛卜雨猶未已察木多支遊府藏委會辦乍雅案之謝都闈及糧務高明府均遣人迎候

右包墩猛卜

初三日西北登山愈形險峻汎卒曰猛虎山也上下三十里有地曰小恩達以察木多北去二百餘里有恩達寨也又曰柳林子察木多之北數十里有大柳林乃呼圖克圖避暑所蓋蕃僧稱其園皆曰柳林也有蕃人數十戶復上山陟降三十里乃至察木多

右猛虎山小恩達

察木多通志云在布政司西南三千五百二十五里東至包墩界一百四十里西至牛屎溝界三百九十里南至結黨北至隆慶界又云察木多在乍雅西北即古康地古稱前藏一名喀木界通川滇其北河有四川橋南河有雲南橋江巴林寺係江心濯結所建寺北水名昌河寺右水名都河故又名昌都昔屬闡教呼圖克圖康熙五十八年大兵進討西藏頒正呼圖克圖印信其文係闡講黃教額爾德尼那門汗之印清字蒙古字夷字三篆住坐察木多大寺其副呼圖克圖住坐邊壩之西甲喇大寺有昌諸巴圖識作倉儲巴五家札聰所管大小寺院五十座今按察木多正副呼圖克圖有四皆住昌都大寺內倉儲巴有二一正一副

和泰庵西藏賦云察木多三藏之二喀木名遙自注西至類伍齊二百二十里南至結黨北至隆慶昔屬闡教呼圖克圖康熙五十八年頒結帕克巴拉呼圖克圖諾們汗之印亦係三譯篆文曰闡講黃教額爾德尼第巴諾們罕之印其二呼圖克圖號錫瓦拉三呼圖克圖號甲喇克大小寺院五十座刺麻四千五百名蕃民七千六百餘戶其俗崇信浮屠生子半為刺麻其地則層巒疊嶂怪岫奇峯乃西藏之門戶古所云康云喀木者即此合前後衛為三藏俗名昌都也共投誠蕃地隸之者二十處

右察木多二條

舊通志云昂楮河在察木多左源出中壩因通雲南亦名雲河雜楮河在察木多右源出九茹因通四川亦名川河二水合流入雲南界今按川河在左雲河在右舊志誤也

西藏志云裏角大山積雪五十里離瓦合一柱拉三日過山至昌都二日乃川滇西藏三界之中最為重地兩山環抱左右有大木橋東走四川南達雲南西通西藏北通青海乃扼要之區余按察木多大寺今在山上南嚮其山自西北來開大嶂寺後屏開三疊左右雙峯聳峙中出一支迤邐而下二里許如龍飲水左右二河自山後環抱而來交會山前其外高山四周形勢非常昔岳大將軍見而惡之駐軍山上移刺麻於下斷其山脈而還之今山上刺麻數千山下土城為遊擊戍兵及糧務駐所城外蕃民四五百戶漢人貿易者數十家與蕃雜處

又按一統志瀾滄江二源一名巫楚河一名鄂穆楚河皆發源於匝坐里岡城西北俱東南流至匝坐里岡城東北

三百餘里察木多廟前一水合流名拉楚河又南流九百餘里至雲南塔城關西入麗江府界為瀾滄江經永昌順甯蒙化景東諸歷阿瓦國老撾地入交趾界注於南海然則此山前左右二河來源皆千餘里而交會無怪昌都形勢獨勝也通志昂楮河即鄂穆宜楚雜楮河即匝楚也

右昂楮雜楮二河合拉楚河二條

蕃人相傳察木多之大呼圖克圖為明建文帝轉世雖無稽足見當時天下憐建文異域亦久而不忘也感成一絕云異代興亡殘骨肉千年遺憾託浮雲長陵抔土空神武西域人猶愛建文

右建文帝為呼圖克圖

宣太守言兩次檄調丹臻江錯四倉儲巴不至今使人三路召之且使紅教刺麻勸其來因論兩呼圖曲直以丹臻

江錯爭權奪印爲非余曰蠻夷政教與中國殊自古不繩以法爲因俗羈縻而已然曲濟嘉木參以蕃僧受印敕安撫教化是其職也不能安撫其下致眾畔散身自出亡已非 國家設那們汗安撫蕃黎之意况乍雅不責貢賦惟供大道烏拉之役使者往來復予雇值而任其屬蕃多所邀索時阻王程人皆視爲畏途比反多取道他塗避之

國家安用此那們汗爲耶彼自不德眾叛出亡

朝廷不討其罪數遣王官勞費遠涉爲之調鞫安撫十年不能定猶不自反敢令屬蕃阻留大臣五十餘日要求無狀此去叛逆一聞耳丹臻江錯護印與羣倉儲巴訪諸牧豎之中收養及歲送藏學經迎回授印以爲那們汗曾何負於彼而反以爲怨耶如有爭權奪印之心則不收養送

藏迎回授印矣且丹臻江錯護印理事乃大臣奏請印已交還何猶言奪至五倉儲巴之放則四朗江折本曲濟嘉木參自族谷喜白瑪奚彭錯達吉皆在丹臻江錯護印之時彭錯則以其叔倉儲巴阿札有功於曲濟嘉木參許以其姪接充後復從乍雅營官捕盜被殺故使爲之丹臻江錯初何嘗爭其權乎

右乍雅兩呼圖克圖曲布

後藏之西爲阿里其西北界近底穆岡城東有拉達克城本一小部落也東西境長一千五百餘里北至葉爾羌十八站西北爲克食米爾西南爲森巴南爲哲孟雄洛敏湯廓爾喀又西南爲披楞其西境內有茫玉納山自茫玉納山以西有地曰補仁又西曰達壩噶爾又西曰雜仁又西北曰堆噶爾本又西北曰茹妥皆拉達克之地堆噶爾本

庫車紀行 卷之六
三
產金五輩達賴刺麻盛時奪取此五處拉達克不敢較道光十年有張格爾餘黨自葉爾羌逃至其地拉達克會長檢獻賞五品頂戴又嘗入藏禮達賴班禪後爲西界外野蕃森巴侵佔其地走唐古忒求救駐藏大臣拒之弗納拉達克怨反投森巴誘之寇唐古忒欲復茫玉納山西故地森巴者其部有三最大而遠者曰然吉森次曰索熱森曰谷朗森道光二十一年索熱森會俄斯爾遂因拉達克來侵藏遣噶布倫往禦卒少不勝補仁五處皆爲所奪大臣以聞發唐古忒大兵勦之森巴勇悍善鎗箭銅礮而不耐寒藏有紅教刺麻宜瑪湯者能誦經祈雪深數尺森巴大凍唐古忒乘雪以連環鎗進攻森巴大敗陣斬俄斯爾擒八百餘人盡復所奪地追至森巴界河而營督唐古

忒兵者噶布倫策墊奪吉戴珠比喜也俄斯爾之妻率眾繼至聞敗大懼然吉森以爲俄斯爾之勇猶陣亡又森巴得唐古忒營中護法神像忽自行動大驚乃使人請和未成決河水淹唐古忒營兵皆走依山策墊奪吉比喜單騎入森巴營責讓之森巴乃奉約而退還所侵拉達克地以處其酋
右拉達克誘森巴犯界

十五日藏中委曲琿堪布增卓堅參及卓尼爾阿旺改桑至察木多會辦乍雅事曲琿堪布者職司經卷堪布中爲第五等卓尼爾則爲達賴供奔走傳宣者
右藏委堪布卓尼爾
前藏西南小部落名哲孟雄西南鄰廓爾喀南接披楞去後藏之帕里三日程北至江孜三百餘里又北一百餘里卽札什倫布舊屬廓爾喀乾隆五十七年廓爾喀平後修

好於唐古忒貢服 王化人強健而地小素畏披楞其
通披楞之處中隔大山有道一綫僅容羊行天生險隘也
藏人言近爲披楞鑿寬此道設卡其上哲孟雄不敢較蓋
披楞欲窺西藏爲廓爾喀所阻哲孟雄路近而小弱故思
取道於此 右哲孟雄聽披楞通道

康輶紀行卷之六 終

